



魏

書

一



リ 8
1735
125



U 8
1735
125



魏收魏書一百一十四篇一百三十卷



新念圖書
此係八明治
月諸同八
郎山田一
所購以贈



Blank lined page with vertical columns.

Blank page with horizontal lines.

皇明崇禎九年歲在癸卯因敦臯月端午琴川毛氏開雕

魏書目錄

帝紀十二 十四卷

第一序紀

魏書一

魏收撰

成帝 毛

節帝 貸

莊帝 觀

明帝 樓

安帝 越

宣帝 推寅

景帝 利

元帝 俟

和帝 肆

定帝 機

僖帝 蓋

威帝 儉

獻帝 隣

聖武帝 詰汾

始祖神元帝 力微

文帝 沙漠汗

章帝 悉鹿

平帝 綽

思帝

弗

桓帝

猗也

太祖平文帝

鬱律

煬帝

紇那

昭成帝

什翼健

昭帝

祿官

穆帝

猗盧

惠帝

賀儻

烈帝

翳槐

第二

太祖道武帝

珪

魏書一

第三

太宗明元帝

嗣

魏書三

闕

第四上

世祖太武帝

燾

魏書四

第四下

魏書四

二

世祖太武帝

恭宗景穆皇帝

吳附

第五

高宗文成帝

濬

魏書五

第六

顯祖獻文帝

弘

魏書六

第七上

高祖孝文帝

宏

魏書七

第七下

高祖孝文帝

魏書七

第八

世宗宣武帝

恪

魏書八

三

第九

魏書九

肅宗孝明帝 諡

第十

魏書十

敬宗孝莊帝 子攸

第十一

魏書十一

前廢帝廣陵王 恭

後廢帝安定王 朗

出帝平陽王 修

第十二

魏書十二 闕

孝靜帝 善見

列傳九十二 九十六卷

第一后妃

魏書十三 闕

神元皇后竇氏

文帝皇后封氏 次妃 蘭

桓帝皇后祁氏

平文皇后王氏

昭成皇后慕容氏

獻明皇后賀氏

道武皇后慕容氏

道武宣穆皇后劉氏

明元昭哀皇后姚氏

明元密皇后杜氏 太武惠太 后竇氏

太武皇后赫連氏

太武敬哀皇后賀氏

景穆恭皇后郁久間氏 文成昭太 后常氏

文成文明皇后馮氏

文成元皇后李氏

獻文思皇后李氏

孝文貞皇后林氏

孝文廢皇后馮氏

孝文幽皇后馮氏

孝文昭皇后高氏

宣武順皇后于氏

宣武皇后高氏

宣武靈皇后胡氏

孝明皇后胡氏

孝靜皇后高氏

第二神元平文諸帝子孫 魏書十四 闕

上谷公紇羅子紇城 王昭

建德公嬰文

真定侯陸曾孫 軌

武陵侯因

長樂王壽樂

望都公頽

曲陽侯素延

順陽公郁

宜都王目辰

穆帝長子六修

吉陽男比干

江夏公呂

高涼王孤六世孫華山王鷲 葦 葦子子華 子華弟子思 孤六世孫上黨王天穆

西河公敦

司徒石

武衛將軍謂子烏真 烏真子興都 興都子東陽王丕

淮陵侯大頭

河間公齊孫志

扶風公處真

文安公泥子屈 屈子磨 磨子

第三昭成子孫

魏書十五闕

寔君

儀弟陰平王烈 秦王觚

秦王翰子衛王儀 儀子中山王纂 幹 幹子慎 慎子端

可悉陵弟忠 忠子壽興 忠弟孫嶷 忠子暉

常山王遵子素 素子可悉陵 可悉陵弟子昭 昭子玄紹 子朱提王銳 崇度兄顥

毗陵王順

陳留王虔顥子嶠

窟咄

遼西公意烈子拔于 拔于曾孫洪超 意烈弟子粟渾 渾子庫汗

第四道武七王

魏書十六

清河王紹

他孫法壽 法僧

陽平王熙子臨淮王他 他曾孫世遵 世遵弟子忻之 世遵弟禹

河間王修略陽王羯兒

河南王曜子頽川王提 提子平原 平原子鑿 和

廣平王連南平王渾 渾子霄 霄曾孫仲罔

長樂王處文

第五明元六王

魏書十七闕

樂平王丕

京兆王黎江陽王繼 繼子文 羅 爽 繼弟羅侯

樂安王範 子良

永昌王健 子仁

建寧王崇

新興王俊

第六大武五王

魏書十八 關

晉王伏羅

東平王翰

臨淮王譚

子提 提子昌 昌子或 孝友 昌弟孚

廣陽王建閭

子嘉 嘉子深 深子湛

南安王余

第七上景穆十二王上

魏書十九 關 五

陽平王新成

子順 衍 衍子融 衍弟欽 欽子孝

京兆王子推

子太興 太興孫暉 太興子仲景 暉太興弟逢 巨

濟陰王小新成

孫彌 彌子暉業 昭業 鬱弟子誕 鬱弟麗 麗子顯和

汝陰王天賜

孫慶和 天賜子 脩義

樂良王萬壽

曾孫忠

廣平王洛侯

濟南王匡

第七中景穆十二王中

魏書十九

任城王雲

子澄 澄子彝 順 順子朗 澄弟嵩 嵩子世雋 嵩弟瞻

第七下景穆十二王下

魏書十九

南安王楨

子中山王英 英子熙 熙弟東平王略 略弟察 熙弟義興 英弟怡 怡子魯郡王肅 東海王暉

城陽王長壽

子鸞 鸞字徽

章武王太洛

嗣王彬 彬子融 東安王凝

樂陵王胡兒

嗣王思暮

安定王休

子燮 願子 貴平

第八文成五王

魏書二十 關

安樂王長樂

子詮 詮子鑿 斌之

廣川王略

子諧

齊郡王簡

子祐

河間王若

嗣王琛

安豐王猛

子延明

第九上獻文六王上

魏書二十一

咸陽王禧

子翼 樹 禧

趙郡王幹

子謐 謐 譚

廣陵王羽

子欣

高陽王彥

子端 獻 昌樂王誕

北海王詳 子顯 瑱

第九下獻文六王下 魏書二十一

彭城王勰 子劭 子直 子正

第十孝文五王 魏書二十二

廢太子恂 京兆王愉 子寶炬

清河王懌 廣平王懷

汝南王悅

第十一 魏書二十三 六

衛操 衛雄 姬滄 孫題 雲

劉庫仁 弟眷 庫仁子顯 族人奴真 奴真兄捷

第十二 魏書二十四

燕鳳 許謙 子洛陽

張袞 孫誕 袞子度 崔道固 道固兄子曾祐 僧淵 僧淵子伯鳳 祖嫡 崔玄伯 弟徽 崔寬 寬父剖 寬子衡 衡子敞 鍾 卬 崔模 高陵

鄧淵 子穎 穎孫述 穎子宗慶 穎弟孫羨 羨子躋

第十三 魏書二十五

長孫嵩 子頽 頽子敦 長孫道生 孫觀 觀子雅 雅子子彥

第十四 魏書二十六

長孫肥 子翰 陳蘭 肥弟孫真 尉古真 弟諾 諾子眷 眷子多侯 多侯 弟慶賓 眷弟地干 古直族玄孫瑾

第十五 魏書二十七

穆崇 孫真 真子泰 崇子觀 觀子壽 壽子罷 罷子建 罷弟亮 亮子紹 壽弟多侯 觀弟曾孫彌 觀弟頽 崇宗人醜善 醜善孫斌 鏡孫子琳 良

第十六 魏書二十八

和跋 子歸 奚牧

莫題 庾業延

賀狄干

李栗

劉潔

古弼

張黎

第十七

魏書二十九

奚斤

子他賴 孫買奴 斤弟孫兜

叔孫建

子俊璘

第十八

魏書三十

王建

子斤 孫度 建曾孫樹

安同

子原頡 同弟子難

樓伏連

兄曾孫毅

丘堆

娥清

劉尼

奚眷

車伊洛

宿石

來大千

周幾

豆代田

周觀

閻大肥

尉撥

陸真

子延

呂洛拔

子文祖

第十九

魏書二十一

于栗磾

子洛拔 洛拔子烈 烈子祚 忠 景 烈弟子昕 烈弟果

第二十

魏書二十二

高湖

子謐 謐子樹生 謐兄真 拔弟膺兒 膺兒子吞 膺兄弟徽 徽子歸義 湖弟曾孫幹

崔逞

子贇 逞兄玄 孫隆宗 族子回 儼從孫靈祐 回族叔軌 軌子偉伯

第二十一

魏書二十三

宋隱

弟輔 叔父洽 洽子宣 宣孫瓊

王憲

子疑 疑子雲

屈遵

孫恒 道賜 道賜子拔

張蒲

子昭 昭子靈符

源賀

子懷 懷子子雍 子雍子延伯 子雍弟子恭

第三十

魏書四十二

薛辯

子謹 謹子拔 拔子胤 拔弟孫慶之 拔弟子和

寇讚

子臻 臻子治

酈範

子道慎 道約 範弟子暉

韓秀

子務

堯暄

第三十一

魏書四十三

嚴稜

兄子玄達

毛脩之

朱脩之

唐和

兄子玄達

劉休賓

子文暉

房法壽

房堅 法壽從弟伯玉 法壽族子景伯 景先 景遠

劉休賓

從祖弟崇吉 崇吉從弟士達

第三十二

魏書四十四

羅結

子斤 斤孫伊利

伊馱

孫益生

乙瓌

子乾歸 乾歸孫瑗

和其奴

荀頹

薛野脂

子虎子 虎子子曇尚

宇文福

子延

費子

孫穆

孟威

第三十三

魏書四十五

韋闐

孫儁 從叔道福 道福從孫元恢 闐從子崇 族弟珍 珍子纘 威 肅 梁頹 頹族曾孫嵩 蘇湛 姜儉

杜銓

族孫頤

裴駿

子脩 脩子詢 脩弟宣 駿從弟安祖

辛紹先

孫祥 少雍 紹先子穆 穆子子藪

柳崇

第三十四

魏書四十六

竇瑾

子遵

許彥

子宗之 宗之兄曾孫綯 許赤虎

李訢

第三十五

魏書四十七

盧玄

子度世 度世子淵 淵子道將 道虔 道約 淵弟子義禧 淵弟昶 昶子元明 玄從祖兄溥

第三十六

高允

孫綽 允弟推 劉模

魏書四十八

第三十七

李靈

子恢 恢孫悅 恢弟子道 道子系 系子宣茂

魏書四十九

崔鑿

子秉 秉子仲哲

第三十八

尉元

子羽

魏書五十

慕容白曜

子真安 弟子契

第三十九

韓茂

子均

魏書五十一

皮豹子

子喜

封勅文

呂羅漢

祖顯 父温

孔伯恭

第四十

趙逸

兄温 從玄孫超宗 令勝 遐 叔隆

魏書五十二

胡方回

胡叟

張湛

兄懷義

宋繇

曾孫稚

段承根

父暉

宗欽

劉昶

索敞

陰世隆

趙柔

第四十一

李孝伯

父曾 兄祥 祥子安世 安世子瑒 郁

魏書五十三

李冲

第四十二

游雅

魏書五十四

高閭

第四十三

游明根

子肇

魏書五十五

劉芳

子獻 獻子騰 芳從子思祖 芳從子懋 芳族兄僧利 僧利子世明 鄭演子長猷

第四十四

魏書五十六

十一

鄭義 子懿 道昭 道昭子嚴祖 義兄孫幼儒 伯猷 輯之 義弟連山

崔辨 子逸 逸子巨倫 逸弟模 楷

第四十五 魏書五十七

高祐 孫顯 諒

崔挺 子孝芬 孝芬子勉 孝芬弟孝暉 孝直 孝政 挺弟振

振子朗 挺從父弟元珍 從祖弟敬邕 敬邕從弟接

第四十六 魏書五十八

楊播 子侃 播弟椿 椿子昱 昱子孝邕

第四十七 魏書五十九

劉昶 子暉 劉武英 蕭寶夤 兄子贊

蕭正表

第四十八 魏書六十 十二

韓麒麟 麟子顯宗 程駿 從祖弟子靈虬

薛安都 孫麟 安都從弟真度 真度子懷吉 懷雋 畢眾敬 子元賓 元賓子祖恬 祖暉 眾敬弟子聞息 申纂 常珍奇

沈文秀 房天樂 文秀族子陵 張讜

田益宗 董巒 陳伯之 孟表

第五十 魏書六十二

李彪 子志 高道悅

第五十一 魏書六十三

王肅 兄子誦 衍 翊 宋弁 子維 紀

第五十二 魏書六十四

郭祚 張彝 子始均

第五十三 魏書六十五 十三

邢巒 子遜 巒弟晏 巒從叔虬 李平 子獎 諧

第五十四 魏書六十六

李崇 子世哲 神軌

崔亮 從弟光韶 光伯

第五十五

魏書六十七

崔光

子勵 光弟敬友 敬友子鴻 鴻子子元 光從弟長文 長文從弟庠

第五十六

魏書六十八

甄琛

子侃 楷琛從弟密 張纂 纂從弟宜軌

高聰

第五十七

魏書六十九

崔休

景顏 延儁族兄聿 族人瑗

袁翻

第五十八

魏書七十

劉藻

子紹珍

傅永

傅豎眼

祖父融 伯父靈慶 父靈 越子敬和 從子文驥

李神

第五十九

魏書七十一

裴叔業

孫譚 子芬之 藹之 兄子彥先 彥先子約 約先弟約 叔業兄子植 韋伯昕 魏承祖 皇甫瑒 梁祐 閻慶胤 柳僧尹 君授 柳玄達 玄達子遠 弟子諧 楊令寶

李元護

子會

席法友

王世弼

子田

江悅之

子文遙 文遙子果 龐樹 李昕榮 張元亮 士孫天與

李苗

羅道真 王安世 辛謙 姜永 永弟漾 庾導 皇甫徽

淳于誕

第六十

魏書七十二

陽尼

從弟藻 藻從弟固

賈思伯

弟思同

李叔虎

從子長仁 長仁從子象

路恃慶

弟思令 從叔雄 雄從弟法常

房亮

曹世表

第六十一

魏書七十三

潘永基

朱元旭

魏書七十四

十四

奚康生

子難

楊大眼

崔延伯

第六十二

魏書七十四

余朱榮

第六十三

魏書七十五

余朱兆

余朱度律

余朱彦伯

弟仲遠世隆世承弼

第六十四

魏書七十六

十五

盧同

第六十五

魏書七十七

宋翻

弟道瑛

辛雄

從兄纂族祖琛琛子悠琛族子珍之

羊深

楊機

高崇

子謙之謙之子子儒緒崇子道穆

第六十六

魏書七十八

孫紹

張普惠

第六十七

魏書七十九

成淹

子霄

范紹

劉桃符

劉道斌

董紹

馮元興

曹道曹昇曹昇

鹿念

張熠

第六十八

魏書八十

朱瑞

叱列延慶

斛斯椿

賈顯度

弟智

樊子鵠

賀拔勝

弟岳

侯莫陳悅

侯淵

第六十九

魏書八十一

十六

綦儁

山偉

劉仁之

宇文忠之

第七十

魏書八十二

李琰之

祖瑩

常景

第七十一上外戚上

魏書八十三

賀訥弟虛從弟悅

劉羅辰

姚黃眉

杜超弟子元寶

賀迷

閻毗常英

馮熙子誕脩

李峻

李惠從孫侃弟

第七十一下外戚下

魏書八十三

高肇子植

于勁

胡國珍兄曾孫虔

李延寔

第七十二儒林

魏書八十四

梁越

盧醜

張偉

梁祚

平恒

陳竒

常爽

劉獻之

張吾貴

劉蘭

孫惠蔚

徐遵明

董徵

刁冲

盧景裕

李同軌

李業興

第七十三文苑

魏書八十五

袁躍

裴敬憲

盧觀

封肅

邢臧

裴伯茂

邢昕

溫子昇

第七十四孝感

魏書八十六

趙琰

長孫慮

乞伏保

孫益德

董落生

楊引

閻元明

吳悉達

令狐仕 皇甫奴 董吐渾 兄養

崔承宗

王續生

李顯達

張昇

倉跋

王崇

郭文恭

第七十五節義

魏書八十七

于什門

段進

石文德

汲固

趙令安 孟蘭強

王玄威

婁提

婁跋寅

劉渴侯

朱長生

于提

馬八龍

門文愛

晁清

劉侯仁

石祖興

邵洪哲

王榮世

胡小虎

孫道登

李凡

張安祖

王間 劉業興 蓋儁

第七十六良吏

魏書八十八

張恂

鹿生

張應

宋世景 李儒

路邕

閻慶胤

明亮

杜纂

裴佗

竇瑗

羊敦

蘇淑

第七十七酷吏

魏書八十九 闕

于洛侯

胡泥

十七

李洪之

高遵

張赦提 趙霸

羊祉

崔暹

酈道元

谷楷

第七十八逸士

魏書九十

哇夸

馮亮

李謐

鄭脩

第七十九術藝

魏書九十一 不全

晁崇

張淵 徐路 高崇祖 孫僧化 信都芳

殷紹

王早

耿玄

劉靈助

江式

周澹

李脩

王顯

蔣少游

侯文和 范審兒

徐謩

崔或

第八十列女

魏書九十二

不全

崔覽妻封氏

封卓妻劉氏

魏溥妻房氏

胡長命妻張氏

平原女子孫氏

房愛親妻崔氏

涇州貞女兕先氏

姚氏婦楊氏

張洪初妻劉氏

董景起妻張氏

陽尼妻高氏

史映周妻耿氏

任城國太妃孟氏

苟金龍妻劉氏

盧元禮妻李氏

河東孝女姚氏

刁思遵妻魯氏

第八十一恩倖

魏書九十三

王叡

子襲 椿 椿妻魏氏 叡弟子翔 靜

王仲興

寇猛

趙脩

茹皓

劉胄 常季賢 陳掃清 徐義恭

趙邕

侯剛

鄭儼

徐紇

第八十二闢官

魏書九十四

宗愛

仇洛齊

段霸

王琚

趙黑

子熾

孫小

張宗之

妻兄子蕭彥

劇鵬

兄買奴 李豐

張祐 子慶

抱嶷 從弟老壽 石榮

王遇

苻承祖

王質

李堅

秦松

白整

劉騰

賈粲

楊範

成軌

王溫

孟鸞

平季

封津 兄憑

劉思逸 張景高 毛暢

第八十三

魏書九十五

十八

匈奴劉聰 父淵 子粲 淵族子曜

羯胡石勒 子大雅 從子虎 虎子世 遵 鑿 冉閔

鐵葉劉虎 子務桓 關陌頭 務桓子悉勿祈 衛辰 衛辰子屈子 屈子子昌 定

徒河慕容廆 子元真 元真子儁 儁子暉 泓 沖 廆弟孫永 元真子垂 垂子寶 蘭汗 寶子盛 垂子熙 高雲 元真子德 德兄子超

臨渭氏苻健 父洪 子生 健弟子堅 堅子丕 丕族子登 登子崇

羌姚萇 父弋仲 兄襄 子興 興子泓

略陽氏呂光 子紹 纂 纂從弟隆

第八十四

魏書九十六

僭晉司馬叡 子紹 紹子衍 岳 岳子翽 奕 叡子昱 昱子昌明 昌明子德宗 德文

竇李雄 父特 叔父流 兄班 雄子期 特弟子壽 壽子勢

第八十五

魏書九十七

島夷桓玄

島夷馮跋 弟文通

島夷劉裕 子義符 義隆 義隆子劭 駿 駿子子業 義隆子彧 彧子昱 準

第八十六

魏書九十八

十九

島夷蕭道成 子贖 贖孫昭業 道成兄子鸞 鸞子寶卷 寶融

島夷蕭衍

第八十七

魏書九十九

私署涼州牧張寔

父軌寔弟茂寔子駿駿子重華重華子曜靈駿子祚重華子玄靖駿子天錫

鮮卑乞伏國仁

子熾磐子暮末熾磐子暮末

鮮卑秃髮烏孤

弟利鹿孤儁檀

私署涼王李暠

子歆

盧水胡沮渠蒙遜

子牧捷乘牧捷兄子萬年

祖蒙遜子安周無諱

第八十八

魏書一百

高句麗

百濟

勿吉

失韋

豆莫婁

地豆子

庫莫奚

契丹

烏洛侯

第八十九

魏書一百一

氏楊難敵

吐谷渾

乙弗勿敵國阿蘭國女王

宕昌羗

高昌

鄧至

蠻

獠

第九十

魏書一百二

西域

鄯善且末于闐蒲山悉居半權于摩渠莎車師且焉耆龜茲姑默温宿尉頭烏孫疏勒悅般耆至拔迷密悉萬斤忸密洛那粟特波斯伏盧尼色知顯伽色泥薄知牟知阿弗六汗呼似密諾色波羅早伽至伽不單者舌伽倍折薛莫孫鉗敦弗敵沙閭浮謁大月氏安息大秦阿鈎羗波路小月氏蜀賁吐呼羅副貨南天竺疊伏羅拔豆噉噉朱居渴槃陁鉢和波知賧彌烏耆乾陁康國

第九十一

魏書一百三

蠕蠕

匈奴宇文莫槐

徒河段就六眷

高車

吐突隣部統突隣統奚侯呂隣部薛于部破多蘭部黠弗素古延部

第九十二

魏書一百四闕

序傳

志十 二十卷

第一

魏書一百五

天象一之一

第二

魏書一百五

天象一之二

第三

魏書一百五闕

天象一之三

第四

魏書一百五闕
市一

天象一之四

第五

魏書一百六

地形二上

第六

魏書一百六

地形二中

第七

魏書一百六
市二

地形二下

第八

魏書一百七

律歷三上

第九

魏書一百七

律歷三下

第十

魏書一百八

禮四之一

第十一

魏書一百八

禮四之二

第十二

魏書一百八

禮四之三

第十三

魏書一百八

禮四之四

第十四

魏書一百九

樂

第十五

魏書一百十

食貨

第十六

魏書一百一十一

刑罰

第十七

魏書一百一十二

靈徵上

第十八

魏書一百一十二

靈徵下

第十九

魏書一百一十三

官氏

第二十

魏書一百一十四

釋老

魏書目錄終

魏書十二紀九十二列傳十志凡一百一十四篇舊分爲一百三十卷北齊尚書右僕射魏收撰初魏史官鄧淵崔浩高允皆作編年書遺落時事三不存一太和中李彪崔光始分紀傳表志之目宣武時邢巒撰高祖起居注崔鴻王遵業補續下逮明帝其後溫子昇作莊帝紀三卷濟陰王暉業撰辨宗室錄三十卷魏末山偉以代人諂附元天穆尒朱世隆與綦雋更主國書二十餘年事迹蕩然萬不記一北齊文宣天保二年詔魏收修魏史博訪百家譜狀搜采遺軼包舉一代始終頗爲詳悉收所取史官本欲才不逮已故房延祐辛元植睦仲刀柔裴昂之高孝幹皆不工纂述其三十五例二十五序九十四論前後二表一啟咸出於收五年表上之悉焚崔李舊書收黨齊毀魏褒貶肆情時論以爲不平文宣命收於尚書省與諸家子孫訴訟者百餘人評論收始亦辨答後不

能抗范陽盧斐頓丘李庶太原王松年並坐謗史受鞭配甲坊有
致死者衆口沸騰號爲穢史時僕射楊愔高正德用事收皆爲其
家作傳二人深黨助之抑塞訴辭不復重論亦未頒行孝昭皇建
中命收更加審覈收請寫二本一送并省一付鄴下欲傳錄者聽
之羣臣競攻其失武成復敕收更易刊正收旣以魏史招衆怨咎
齊亡之歲盜發其冢棄骨于外隋文帝以收書不實平繪中興書
叙事不倫命魏澹顏之推辛德源更撰魏書九十二卷以西魏爲
正東魏爲僞義例簡要大矯收繪之失文帝善之煬帝以澹書猶
未盡善更敕楊素及潘徽褚亮歐陽詢別修魏書未成而素卒唐
高祖武德五年詔侍中陳叔達等十七人分撰後魏北齊周隋梁
陳六代史歷年不成太宗初從秘書奏罷修魏書止撰五代史高
宗時魏澹孫同州刺史克已續十志十五卷魏之本系附焉唐書

藝文志又有張大素後魏書一百卷裴安時元魏書三十卷今皆
不傳稱魏史者惟以魏收書爲主焉孔子稱質勝文則野文勝質
則史三代文章莫盛於周東周秦漢雖戰爭喪亂前古遺風餘烈
流而未絕賢君忠臣蹈道之徒功業行誼彰灼顯布高才秀士詞
章論議諫諍辯說嘉謀竒策皆可以驚聽動俗爲後世軌範而左
丘明司馬遷班固以良史之才博學善叙事不虛美隱惡故傳之
簡牘千餘年而不磨滅東漢魏晉去聖人稍遠史官才益淺薄永
興失政戎狄亂華先王之澤掃地盡矣拓跋氏乘後燕之衰蠶食
并冀暴師喋血三十餘年而中國略定其始也公卿方鎮皆故部
落酋大雖參用趙魏舊族往往以猜忌夷滅爵而無祿故吏多貪
墨刑法峻急故人相殘賊不貴禮義故士無風節貨賂大行故俗
尚傾奪遷洛之後稍用夏禮宣武柔弱孝明冲幼政刑弛緩風俗

媮惡上下相蒙紀綱大壞母后亂於內羣盜撓其外禍始於六鎮
釁成於尔朱國分爲二而亡矣雖享國百餘年典章制度內外風
俗大抵與劉石慕容苻姚略同道武太武暴戾甚於聰虎孝文之
疆不及苻堅其文章儒學之流旣無足紀述謀臣辯士將帥功名
又不可希望前世而修史者言詞質俚取捨失衷其文不直其事
不核終篇累卷皆官爵州郡名號雜以冗委瑣曲之事覽之厭而
遺忘學者陋而不習故數百年間其書亡逸不完者無慮三十卷
今各疏于逐篇之末然上繼魏晉下傳周齊隋唐六十年廢興大
略不可闕也臣攷臣恕臣燾臣祖禹謹序目錄昧死上

魏書卷一

序紀第一

昔黃帝有子二十五人或內列諸華或外分荒服昌意少子受封
北土國有大鮮卑山因以爲號其後世爲君長統幽都之北廣漠
之野畜牧遷徙射獵爲業淳樸爲俗簡易爲化不爲文字刻木紀
契而已世事遠近人相傳授如史官之紀錄焉黃帝以土德王北
俗謂土爲托謂后爲跋故以爲氏其裔始均入仕堯世逐女魃於
弱水之北民賴其勤帝舜嘉之命爲田祖爰歷三代以及秦漢獯鬻
獫狁山戎匈奴之屬累代殘暴作害中州而始均之裔不交南夏
是以載籍無聞焉積六十七世至成皇帝諱毛立聰明武略遠近
所推統國三十六大姓九十九威振北方莫不率服崩
節皇帝諱貸立崩

莊皇帝諱觀立崩

明皇帝諱樓立崩

安皇帝諱越立崩

宣皇帝諱推寅立南遷大澤方千餘里厥土昏冥沮洳謀更南徙未行而崩

景皇帝諱利立崩

元皇帝諱伋立崩

和皇帝諱肆立崩

定皇帝諱機立崩

僖皇帝諱蓋立崩

威皇帝諱儉立崩

獻皇帝諱隣立時有神人言於國曰此土荒遐未足以建都邑宜

復徙居帝時年衰老乃以位授子

聖武皇帝諱詰汾獻帝命南移山谷高深九難入阻於是欲止有神獸其形似馬其聲類牛先行導引歷年乃出始居匈奴之故地其遷徙策略多出宣獻二帝故人並號曰推寅蓋俗云鑽研之義初聖武帝嘗率數萬騎田於山澤歛見輜輶自天而下既至見美婦人侍衛甚盛帝異而問之對曰我天女也受命相偶遂同寢宿且請還曰明年周時復會此處言終而別去如風雨及期帝至先所田處果復相見天女以所生男授帝曰此君之子也善養視之子孫相承當世爲帝王語訖而去子卽始祖也故時人諺曰詰汾皇帝無婦家力微皇帝無舅家帝崩始祖神元皇帝諱力微立生而英叡元年歲在庚子先是西部內侵國民離散依於沒鹿回部大人竇

賓始祖有雄傑之度時人莫測後與賓攻西部軍敗失馬步走始祖使人以所乘駿馬給之賓歸令其部內求與馬之人當加重賞始祖隱而不言久之賓乃知大驚將分國之半以奉始祖始祖不受乃進其愛女賓猶思報恩固問所欲始祖請率所部北居長川賓乃敬從積十數歲德化大洽諸舊部民咸來歸附

二十九年賓臨終戒其二子使謹奉始祖其子不從乃陰謀爲逆始祖召殺之盡并其衆諸部大人悉皆款服控弦上馬二十餘萬三十九年遷於定襄之盛樂夏四月祭天諸部君長皆來助祭唯白部大人觀望不至於是徵而戮之遠近肅然莫不震懾始祖乃告諸大人曰我歷觀前世匈奴蹋頓之徒苟貪財利抄掠邊民雖有所得而其死傷不足相補更招寇讎百姓塗炭非常計也於是與魏和親

四十二年遣子文帝如魏且觀風土魏景元二年也文皇帝諱沙漠汗以國太子留洛陽爲魏賓之寇聘問交市往來不絕魏人奉遺金帛繒絮歲以萬計始祖與隣國交接篤信推誠不爲倚伏以要一時之利寬恕任真而遐邇歸仰魏晉禪代和好仍密始祖春秋已邁帝以父老求歸晉武帝具禮護送

四十八年帝至自晉
五十六年帝復如晉其年冬還國晉遣帝錦罽繒綵綿絹諸物咸出豐厚車牛百乘行達并州晉征北將軍衛瓘以帝爲人雄異恐爲後患乃密啟晉帝請留不遣晉帝難於失信不許瓘復請以金錦賂國之大人令致問隙使相危害晉帝從之遂留帝於是國之執事及外部大人皆受瓘貨

五十八年方遣帝始祖聞帝歸大悅使諸部大人詣陰館迎之酒

酣帝仰視飛鳥謂諸大人曰我爲汝曹取之援彈飛丸應弦而落時國俗無彈衆咸大驚乃相謂曰太子風采被服同於南夏兼奇術絕世若繼國統變易舊俗吾等必不得志不若在國諸子習本淳樸咸以爲然且離間素行乃謀危害並先馳還始祖問曰我子旣歷他國進德何如皆對曰太子才藝非常引空弓而落飛鳥是似得晉人異法怪術亂國害民之兆惟願察之自帝在晉之後諸子愛寵日進始祖年踰期頤頗有所惑聞諸大人之語意乃有疑因曰不可容者便當除之於是諸大人乃馳詣塞南矯害帝旣而始祖甚悔之帝身長八尺英姿瓌偉在晉之日朝士英俊多與親善雅爲人物歸仰後乃追謚焉其年始祖不豫烏丸王庫賢親近任勢先受衛瓘之貨故欲沮動諸部因在庭中礪鉞斧諸大人問欲何爲答曰上恨汝曹讒殺太子今欲盡收諸大人長子殺之大

人皆信各各散走始祖尋崩凡饗國五十八年年一百四歲太祖卽位尊爲始祖

崩章皇帝諱悉鹿立始祖之子也諸部離判國內紛擾饗國九年而

崩平皇帝諱綽立章帝之少弟也雄武有智略威德復舉

七年匈奴宇文部大人莫槐爲其下所殺更立莫槐弟普撥爲大人帝以女妻撥子丘不勤帝饗國七年而崩

思皇帝諱弗立文帝之少子也聰哲有大度爲諸父兄所重政崇寬簡百姓懷服饗國一年而崩

昭皇帝諱祿官立始祖之子也分國爲二部帝自以一部居東在上谷北濡源之西東接宇文部以文帝之長子桓皇帝諱猗龜統一部居代郡之參合陂北以桓帝之弟穆皇帝諱猗盧統一部居

定襄之盛樂故城自始祖以來與晉和好百姓又安財畜富實控
弦騎士四十餘萬是歲穆帝始出并州遷雜胡北徙雲中五原朔
方又西渡河擊匈奴烏桓諸部自杏城以北八十里迄長城原夾
道立碣與晉分界

二年葬文帝及皇后封氏初思帝欲改葬未果而崩至是述成前
意焉晉成都王司馬穎遣從事中郎田思河間王司馬顥遣司馬
靳利并州刺史司馬騰遣主簿梁天並來會葬遠近赴者二十萬
人

二年桓帝渡漠北巡因西略諸國

四年東部未耐婁大人倍斤入居遼東

五年宇文莫廐之子遜昵延朝貢帝嘉其誠欵以長女妻焉

七年桓帝至自西略諸降附者二十餘國凡積五歲今始東還

十年晉惠帝爲成都王穎逼留在鄴匈奴別種劉淵反於離石自
號漢王并州刺史司馬騰來乞師桓帝率十餘萬騎帝亦同時大
舉以助之大破淵衆於西河上黨會惠帝還洛騰乃辭師桓帝與
騰盟於汾東而還乃使輔相衛雄段繁於參合陂西累石爲亭樹
碑以記行焉

十一年劉淵攻司馬騰騰復乞師桓帝以輕騎數千救之斬淵將
綦母豚淵南走蒲子晉假桓帝大單于金印紫綬是歲桓帝崩帝
英傑魁岸馬不能勝常乘安車駕大牛牛角容一石帝會中蠱歐
吐之地仍生榆木參合陂土無榆樹故世人異之至今傳記帝統
部凡十一年後定襄侯衛操樹碑於大邗城以頌功德子普根代
立

十二年賓人李雄僭帝號於蜀自稱大成

十三年昭帝崩徒何大單于慕容廆遣使朝貢是歲羯胡石勒與
晉馬牧帥汲桑反

穆皇帝天姿英特勇略過人昭帝崩後遂總攝三部以爲一統
元年劉淵僭帝號自稱大漢

三年晉并州刺史劉琨遣使以子遵爲質帝嘉其意厚報饋之白
部大人叛入西河鐵弗劉虎舉衆於雁門以應之攻琨新興雁門
二郡琨來乞師帝使弟子平文皇帝將騎二萬助琨擊之大破白
部次攻劉虎屠其營落虎收其餘燼西走度河窟居朔方晉懷帝
進帝大單于封代公帝以封邑去國懸遠民不相接乃從琨求句
王陁北之地琨自以託附聞之大喜乃徙馬邑陰館樓煩繁峙崞
五縣之民於陁南更立城邑盡獻其地東接代郡南連西河朔方
方數百里帝乃徙十萬家以充之劉琨又遣使乞師救洛陽帝遣

步騎二萬助之晉太傅東海王司馬越辭以洛中饑饉師乃還是
年劉淵死子聰僭立

四年劉琨牙門將邢延據新興叛招引劉聰帝遣軍討之聰退走

五年劉琨遣使乞師以討劉聰石勒帝以琨忠義矜而許之會聰
遣其子粲襲晉陽害琨父母而據其城琨來告難帝大怒遣長子
六脩桓帝子普根及衛雄范班姬澹等爲前鋒帝躬統大衆二十
萬爲後繼粲懼焚輜重突圍遁走縱騎追之斬其將劉儒劉豐簡
令張平邢延伏尸數百里琨來拜謝帝以禮待之琨固請進軍帝
曰吾不早來致卿父母見害誠以相愧今卿已復州境然吾遠來
士馬疲弊且待終舉賊矣可盡乎饋琨馬牛羊各千餘車令百乘
又面動銳戍之而還是年晉雍州刺史賈匹京兆太守閻鼎以晉
懷帝爲劉聰所執共立懷帝兄子秦王業爲太子於長安稱行臺

帝復戒嚴與琨更剋大舉命琨自列晉行臺部分諸軍帝將遣十萬騎從西河鑿谷南出晉軍從蒲坂東度會於平陽就食晉粟迎復晉帝事不果待

六年城盛樂以爲北都脩故平城以爲南都帝登平城西山觀望地勢乃更南百里於灑水之陽黃瓜堆築新平城晉人謂之小平城使長子六脩鎮之統領南部

七年帝復與劉琨約期會於平陽會石勒擒王浚國有匈奴雜胡萬餘家多勒種類聞勒破幽州乃謀爲亂欲以應勒發覺伏誅討聰之計於是中止

八年晉愍帝進帝爲代王置官屬食代常山二郡帝忿聰勒之亂志欲平之先是國俗寬簡民未知禁至是明刑峻法諸部民多以違命得罪凡後期者皆舉部戮之或有室家相攜而赴死所人問何之答曰當往就誅其威嚴伏物皆此類也

九年帝召六脩六脩不至帝怒討之失利乃微服民間遂崩普根先守外境聞難來赴攻六脩滅之衛雄姬澹率晉人及烏丸三百餘家隨劉遵南奔并州普根立月餘而薨普根子始生桓帝后立之其冬普根子又薨是年李雄遣使朝貢

平文皇帝諱鬱律立思帝之子也姿質雄壯甚有威略元年歲在丁丑

二年劉虎據朔方來侵西部帝逆擊大破之虎單騎迸走其從弟路孤率部落內附帝以女妻之西兼烏孫故地東吞勿吉以西控弦上馬將有百萬劉聰死子粲僭立爲其將靳準所殺淵族子曜僭立帝聞晉愍帝爲曜所害顧謂大臣曰今中原無主天其資我乎劉曜遣使請和帝不納是年司馬叡僭稱大位於江南

三年石勒自稱趙王遣使乞和請爲兄弟帝斬其使以絕之

四年私署涼州刺史張茂遣使朝貢

五年僭晉司馬叡遣使韓暢加崇爵服帝絕之治兵講武有平南夏之意桓帝后以帝得衆心恐不利於己子害帝遂崩大人死者數十人天興初尊曰太祖

惠皇帝諱賀儁立桓帝之中子也以五年爲元年未親政事太后臨朝遣使與石勒通和時人謂之女國使

二年司馬叡死子紹僭立

四年帝始臨朝以諸部人情未悉欵順乃築城於東木根山徙都之是年張茂死兄寔子駿立遣使朝貢

五年帝崩是年司馬紹死子衍僭立

煬皇帝諱紇那立惠帝之弟也以五年爲元年

三年石勒遣石虎率騎五千來寇邊部帝禦之於句注陁北不利遷於大寧時烈帝居於舅賀蘭部帝遣使求之賀蘭部帥藹頭擁護不遣帝怒召宇文部并勢擊藹頭宇文衆敗帝還大寧

四年石勒擒劉曜

五年帝出居於宇文部賀蘭及諸部大人共立烈帝

烈皇帝諱翳槐立平文之長子也以五年爲元年石勒遣使求和帝遣弟昭成皇帝如襄國從者五千餘家

二年石勒僭立自稱大趙王

五年勒死子大雅僭立慕容廆死子元真代立

六年石虎廢大雅僭立李雄死兄子班立雄子期殺班自立

七年藹頭不脩臣職召而戮之國人復貳煬帝自宇文部還入諸部大人復奉之

煬皇帝復立以七年爲後元年烈帝出居於鄴石虎奉第宅伎妾奴婢什物

三年石虎遣將李穆率騎五千納烈帝於大寧國人六千餘落叛煬帝煬帝出居於慕容部

烈皇帝復立以三年爲後元年城新盛樂城在故城東南十里一年而崩

昭成皇帝諱什翼犍立平文之次子也生而奇偉寬仁大度喜怒不形於色身長八尺隆準龍顏立髮委地臥則乳垂至席烈帝臨

崩顧命曰必迎立

什翼犍宋本諱

社稷可安烈帝崩帝弟孤乃自詣鄴奉

迎與帝俱還事在孤傳十一月帝卽位於繁峙之北時年十九稱建國元年是歲李雄從弟壽殺期僭立自號曰漢

二年春始置百官分掌衆職東自歲貊西及破洛那莫不欵附夏

五月朝諸大人於參合陂議欲定都灑源川連日不決乃從太后計而止語在皇后傳娉慕容元真妹爲皇后

三年春移都於雲中之盛樂宮

四年秋九月築盛樂城於故城南八里皇后慕容氏崩冬十月劉虎寇西境帝遣軍逆討大破之虎僅以身免虎死子務桓立始來歸順帝以女妻之十二月慕容元真遣使朝貢并薦其宗女

五年夏五月幸參合陂秋七月七日諸部畢集設壇埒講武馳射因以爲常八月還雲中是年秋司馬衍死弟岳僭立

六年秋八月慕容元真遣使請薦女是年李壽死子勢僭立遣使朝貢

七年春二月遣大人長孫秩迎后慕容氏元真之女於境夏六月皇后至自和龍秋七月慕容元真遣使奉聘求交婚帝許之九月

以烈帝女妻之其年司馬岳死子聃僭立

八年慕容元真遣使朝貢是年張駿私署假涼王

九年石虎遣使朝貢是年張駿死子重華代立

十年遣使詣鄴觀釁是年司馬聃擒李勢張重華遣使朝貢

十一年慕容元真死子儁代立

十二年西巡至河而還是年石虎死子世立世兄遵殺世自立遵兄鑿殺遵自立

十三年魏郡人冉閔殺石鑿僭立

十四年帝曰石胡衰滅冉閔肆禍中州紛梗莫有匡救吾將親率六軍廓定四海乃敕諸部各率所統以俟大期諸大人諫曰今中州大亂誠宜進取如聞豪彊並起不可一舉而定若或留連經歷歲稔恐無永逸之利或有虧損之憂帝乃止是歲氏苻健僭稱大

位自號大秦

十五年慕容儁滅冉閔僭尊號

十六年慕容儁遣使朝貢是年張重華死子曜靈立重華庶兄祚殺曜靈而自立稱涼公

十七年遣使於慕容儁張祚復稱涼王置百官遣使朝貢

十八年太后王氏崩是年苻健死子生僭立羌姚襄自稱大將軍大單于張瓘宋混殺張祚立重華少子玄靖稱涼王

十九年春正月劉務桓死其弟闕頭立潛謀反叛二月帝西巡因而臨河使人招喻闕頭從命冬慕容儁來請婚許之

二十年夏五月慕容儁奉納禮幣是年苻堅殺苻生而僭立姚襄為苻眉所殺

二十一年闕頭部民多叛懼而東走渡河半濟而冰陷後衆盡歸

闕頭兄子悉勿祈初闕頭之叛悉勿祈兄弟十二人在帝左右盡遣歸欲其自相猜離至是悉勿祈奪其衆闕頭窮而歸命帝待之如初

二十二年春帝東巡至於桑乾川三月慕容儁遣使朝貢夏四月帝還雲中悉勿祈死弟衛辰立秋八月衛辰遣子朝貢

二十三年夏六月皇后慕容氏崩秋七月衛辰來會葬因而求婚許之是歲慕容儁死子暉立遣使致賻

二十四年春衛辰遣使朝聘是年司馬冉死衍子千齡僭立

二十五年帝南巡至君子津冬十月行幸代十一月慕容暉薦女備後宮

二十六年冬十月帝討高車大破之獲萬口馬牛羊百餘萬頭是年張重華弟天錫殺玄靖而自立

二十七年春車駕還雲中冬十一月討沒歌部破之獲牛馬羊數百萬頭

二十八年春正月衛辰謀反東渡河帝討之衛辰懼而遁走冬十

二月苻堅遣使朝貢是歲司馬千齡死弟奕僭立

二十九年夏五月遣燕鳳使苻堅

三十年冬十月帝征衛辰時河水未成帝乃以葦絙約澌俄然水合猶未能堅乃散葦於上水草相結如浮橋焉衆軍利涉出其不

意衛辰與宗族西走收其部落而還俘獲生口及馬牛羊數十萬頭

三十一年春帝至自西伐班賞各有差

三十二年正月帝南幸君子津冬十月幸代

三十三年冬十一月征高車大破之是年苻堅擒慕容暉

三十四年春長孫斤謀反伏誅斤之反也拔刃向御座太子獻明皇帝諱寔格之傷脇夏五月薨後追謚焉秋七月皇孫珪生大赦

是年司馬奕臣桓温廢奕爲海西公立叡子昱

三十五年司馬昱死子昌明僭立

三十六年夏五月遣燕鳳使苻堅

三十七年帝征衛辰衛辰南走

三十八年衛辰求援於苻堅

三十九年苻堅遣其大司馬苻洛率衆二十萬及朱彤張蚝鄧羌等諸道來寇侵逼南境冬十一月白部獨孤部禦之敗績南部大人劉庫仁走雲中帝復遣庫仁率騎十萬逆戰於石子嶺王師不利帝時不豫羣臣莫可任者乃率國人避於陰山之北高車雜種盡叛四面寇鈔不得芻牧復度漠南堅軍稍退乃還十二月至雲中旬有二日帝崩時年五十七太祖卽位尊曰高祖帝雅性寬厚智勇仁恕時國中少繒帛代人許謙盜絹二匹守者以告帝匿之

謂燕鳳曰吾不忍視謙之面卿勿泄言謙或慙而自殺爲財辱士非也帝常擊西部叛賊流矢中目賊破之後諸大臣執射者各持錐力欲屠割之帝曰彼各爲其三何罪也乃釋之是歲苻堅滅張天錫

史臣曰帝王之興也必有積德累功博利道協幽顯方契神祇之心有魏奄迹幽方世居君長淳化育民與時無競神元生自天女桓穆勤於晉室靈心人事夫豈徒然昭成以雄傑之姿包君子之量征伐四克威被荒遐乃立號改都恢隆大業終於百六十載光宅區中其原固有由矣

魏書卷二

太祖紀第二

太祖道武皇帝諱珪昭成皇帝之嫡孫獻明皇帝之子也母曰獻明賀皇后初因遷徙遊於雲澤旣而寢息夢日出室內寤而見光自牖屬天歛然有感以建國三十四年七月七日生太祖於參合陂北其夜復有光明昭成大悅羣臣稱慶大赦告於祖宗保者以帝體重倍於常兒竊獨奇怪明年有榆生於埋胞之坎後遂成林弱而能言目有光曜廣頰大耳衆咸異之年六歲昭成崩苻堅遣將內侮將遷帝於長安旣而獲免語在燕鳳傳堅軍旣還國衆離散堅使劉庫仁劉衛辰分攝國事南部大人長孫嵩及元他等盡將故民南依庫仁帝於是轉幸獨孤部

元年葬昭成皇帝於金陵營梓宮木梯盡生成林帝雖冲切而疑

然不羣庫仁常謂其子曰帝有高天下之志興復洪業光揚祖宗者必此主也

二年冬十月苻堅敗于淮南是月慕容文等殺庫仁庫仁弟眷攝國部

八年慕容暉弟冲僭立姚萇自稱大單于萬年秦王慕容垂僭稱燕王

九年庫仁子顯殺眷而代之乃將謀逆商人王霸知之履帝足於衆中帝乃馳還是時故大人梁蓋盆子六眷爲顯謀王盡知其計密使部人穆崇馳告帝乃陰結舊臣長孫健元他等秋八月乃幸賀蘭部其日顯果使人求帝不及語在獻明太后傳是歲鮮卑乞伏國仁私署大單于苻堅爲姚萇所殺子丕僭立

登國元年春正月戊申帝卽代王位郊天建元大會於牛川復以長孫嵩爲南部大人以叔孫普洛爲北部大人班賜叙勳各有差二月幸定襄之盛樂息衆課農三月劉顯自善無南走馬邑其族奴真率所部來降夏四月改稱魏王五月車駕東幸陵石護佛侯部帥侯辰乙弗部帥代題叛走諸將追之帝曰侯辰等世脩職役雖有小愆宜且忍之當今草朔人情未一愚近者固應趨起不足追也秋七月己酉車駕還盛樂代題復以部落來降旬有數日亡奔劉顯帝使其孫倍斤代領部落是月劉顯弟亢泥率騎掠奴真部落旣而率以來降初帝叔父窟咄爲苻堅徙于長安因隨慕容永永以爲新興太守八月劉顯遣弟亢泥迎窟咄以兵隨之來逼南境於是諸部騷動人心顧望帝左右于植等與諸部人謀爲逆以應之事泄誅造謀者五人餘悉不問帝慮內難乃北踰陰山幸賀蘭部阻山爲固遣行人安同長孫賀使于慕容垂以徵師垂遣

使朝貢并令其子賀麟帥步騎以隨同等冬十月賀麟軍未至而寇已前逼於是北部大人叔孫普洛等十三人及諸烏丸亡奔衛辰帝自弩山遷幸牛川屯于延水南出代谷會賀麟於高柳大破窟咄窟咄奔衛辰殺之帝悉收其衆十二月慕容垂遣使朝貢奉帝西單于印綬封上谷王帝不納是歲慕容垂僭稱皇帝於中山自號大燕苻丕死苻登自立於隴東姚萇稱皇帝於長安自號大秦慕容冲爲部下所殺慕容永僭立

二年春正月班賜功臣長孫嵩等七十三人各有差二月帝幸寧川夏五月遣行人安同徵兵於慕容垂使子賀麟率衆來會六月帝親征劉顯於馬邑南追至彌澤大破之顯南奔慕容永盡收其部落秋八月帝至自伐顯冬十月癸卯幸濡源遣外朝大人王建使於慕容垂十一月遂幸赤城十有二月巡松漠還幸牛川

三年春二月帝東巡夏四月幸東赤城五月癸亥北征庫莫奚六月大破之獲其四部雜畜十餘萬渡弱落水班賞將士各有差秋七月庚申庫莫部帥鳩集遺散夜犯行宮縱騎撲討盡殺之其月帝還赤城八月使九原公元儀使於慕容垂冬十月慕容垂遣使朝貢十有二月辛卯車駕西征至女水討解如部大破之獲男女雜畜十數萬是歲乞伏國仁兄弟乾歸立私署河南王

四年春正月甲寅襲高車諸部落大破之二月癸巳至女水討叱突隣部大破之戊戌賀染干兄弟率諸部來救與大軍相遇逆擊走之夏四月行還赤城五月陳留公元虔使於慕容垂冬十月垂遣使朝貢是歲氏呂光自稱三河王遣使朝貢

五年春三月甲申帝西征次鹿渾海襲高車表紇部大破之虜獲生口馬牛羊二十餘萬慕容垂遣子賀麟率衆來會夏四月丙寅

行幸意辛山與賀麟討賀蘭紇突隣紇奚諸部落大破之六月還幸牛川衛辰遣子直力鞬寇賀蘭部圍之賀訥等請降告困秋七月丙子帝引兵救之至羊山直力鞬退走八月還幸牛川遣秦王觚使於慕容垂九月壬申討叱奴部於囊曲河大破之冬十月遷雲中討高車豆陳部於狼山破之十有一月紇奚部大人庫寒舉部內屬十有二月紇突隣大人屈地鞬舉部內屬帝還次白漠六年春二月幸紐埏川三月遣九原公元儀陳留公元虔等西討黠弗部大破之夏四月祠天六月慕容賀麟破賀訥於赤城帝引兵救之麟退走秋七月壬申講武於牛川行還紐埏川慕容垂止元觚而求名馬帝絕之乃遣使於慕容永使其大鴻臚慕容鈞奉表勸進尊號其月衛辰遣子直力鞬出柵楊塞侵及黑城九月帝襲五原屠之收其積穀還紐埏川於柵陽塞北樹碑記功冬十

月戊戌北征蠕蠕追之及於大磧南牀山下大破之班賜從臣各有差其東西二部王匹候跋及溫紇提斬別帥屋擊于事具蠕蠕傳十有一月戊辰還幸紐埏川戊寅衛辰遣子直力鞬寇南部巳卯車駕出討壬午大破直力鞬軍於鐵岐山南獲其器械輜重牛羊二十餘萬戊子自五原金津南渡河辛卯次其所居悅跋城衛辰父子奔遁壬辰詔諸將追之擒直力鞬十有二月獲衛辰尸斬以徇遂滅之語在衛辰傳衛辰少子屈丐亡奔薛于部車駕次于鹽池自河以南諸部悉平簿其珍寶畜產名馬三十餘萬匹牛羊四百餘萬頭班賜大臣各有差收衛辰子弟宗黨無少長五千餘人盡殺之山胡酋大幡頽業易于等率三千餘家降附出居于馬邑是歲起河南宮

七年春正月幸木根山遂次黑鹽池饗宴羣臣觀諸國貢使北之

美水三月甲子宴羣臣於水濱還幸河南宮西部泣黎大人茂鮮
叛走遣南部大人長孫嵩追討大破之夏五月班賜諸官馬牛羊
各有差秋八月行幸漠南仍築巡臺冬十有二月慕容永遣使朝
貢是歲皇子嗣宋本諱生

八年春正月帝南巡二月幸殺羊原赴白樓三月車駕西征侯呂
隣部夏四月至苦水大破之五月還幸白樓慕容垂討慕容永於
長子六月車駕北巡永來告急遣陳留公元虔將軍庾岳率騎五
萬東度河救之破類拔部帥劉曜等徙其部落元虔等因屯秀容
慕容垂遂圍長子秋七月車駕臨幸新壇庚寅宴羣臣仍講武先
是衛辰子屈丐奔薛于部徵之不送八月帝南征薛于部帥太悉
佛於三城會其先出擊曹覆帝乘虛屠其城獲太悉佛子珍寶徙
其民而還太悉佛聞之來赴不及遂奔姚興九月還幸河南宮是

歲姚萇死

九年春三月帝北巡使東平公元儀屯田於河北五原至於桐陽
塞外夏五月田於河東秋七月還幸河南宮冬十月蠕蠕社崙等
率部落西走事具蠕蠕傳是歲姚萇子興僭立殺苻登慕容垂滅
永

十年春正月太悉佛自長安還嶺北上郡以西皆應之夏五月幸
鹽池六月還幸河南宮秋七月慕容垂遣其子寶來寇五原造船
收穀帝遣右司馬許謙徵兵於姚興東平公元儀徙據朔方八月
帝親治兵於河南九月進師臨河築臺告津連旌沿河東西千里
有餘是時陳留公元虔五萬騎在東以絕其左元儀五萬騎在河
北以承其後略陽公元遵七萬騎塞其中山之路冬十月辛未寶
燒船夜遁十一月己卯帝進軍濟河乙酉夕至參合陂丙戌大破

之語在寶傳生擒其陳留王紹魯陽王倭奴桂林王道成濟陰公尹國北地王世子鍾葵安定王世子羊兒以下文武將吏數千人器甲輜重軍資雜財十餘萬計於俘虜之中擢其才識者賈彝賈閏晁崇等與參謀議憲章故實班賞大臣將校各有差十有二月還幸雲中之盛樂

皇始元年春正月大蒐于定襄之虎山因東幸善無北陂三月慕容垂來寇桑乾川陳留公元虔先鎮平城時徵兵未集虔率麾下邀擊失利死之垂遂至平城西北踰山結營聞帝將至乃築城自守疾甚遂遁走死於上谷子寶匿喪而還至中山乃僭立夏六月癸酉遣將軍王建等二軍討寶廣甯太守劉亢泥斬之徙其部落寶上谷太守慕容普隣捐郡奔走丁亥皇太后賀氏崩是月葬獻明太后秋七月左司馬許謙上書勸進尊號帝始建天子旌旗出

入警蹕於是改元八月庚寅治兵于東郊己亥大舉討慕容寶帝親勒六軍四十餘萬南出馬邑踰于句注旌旗駱驛二千餘里鼓行而前民屋皆震別詔將軍封真等三軍從東道出襲幽州圍薊九月戊午次陽曲乘西山臨觀晉陽命諸將引騎圍脇已而罷還寶并州牧遼西王農大懼將妻子棄城夜出東遁并州平初建臺省置百官封公侯將軍刺史太守尚書郎已下悉用文人帝初拓中原留心慰納諸士大夫詣軍門者無少長皆引入賜見存問周悉人得自盡苟有微能咸蒙叙用己未詔輔國將軍奚牧略地晉川獲慕容寶丹陽王買得等於平陶城冬十月乙酉車駕出井陘使冠軍將軍王建左軍將軍李粟五萬騎先驅啓行十有一月庚子朔帝至真定自常山以東守宰或捐城奔竄或稽顙軍門唯中山鄴信都三城不下別詔征東大將軍東平公儀五萬騎南攻鄴

冠軍將軍王建左軍將軍李粟等攻信都軍之所行不得傷民桑棗戊午進軍中山己未引騎圍之帝謂諸將曰朕量寶不能出戰必當憑城自守偷延日月急攻則傷士久守則費糧不如先平鄴信都然後還取中山於計爲便若移軍遠去寶必散衆求食民間如此則人心離阻攻之易克諸將稱善丁卯車駕幸魯口城是歲司馬昌明死子德宗僭立遣使朝貢呂光僭稱天王號大涼遣使朝貢

二年春正月己亥朔大饗羣臣於魯口慕容寶遣其左衛將軍慕容騰寇博陵殺中山太守及高陽諸縣令長抄掠租運是時信都未下庚申乃進軍壬戌引騎圍之其夜寶冀州刺史宜都王慕容鳳踰城奔走歸于中山癸亥寶輔國將軍張驥護軍將軍徐超率將吏已下舉城降寶聞帝幸信都乃趣博陵之深澤屯淖沔水遣

弟賀麟寇楊城殺常山守兵三百餘人寶悉出珍寶及宮人招募郡縣羣盜無賴者多應之二月己巳帝進幸楊城丁丑軍于鉅鹿之栢肆塢臨淖沔水其夜寶悉衆犯營燎及行宮兵人駭散帝驚起不及衣冠跣出擊鼓俄而左右及中軍將士稍稍來集帝設奇陳列烽營外縱騎衝之寶衆大敗斬首萬餘級擒其將軍高長等四千餘人戊寅寶走中山獲其器仗輜重數十萬計寶尚書閔亮祕書監崔暹太常孫沂殿中侍御史孟輔等並降降者相屬賜拜職爵各有差平原徐超聚衆反於畔城詔將軍奚辱捕斬之并州守將封真率其種族與徒何爲逆將攻刺史元延延討平之是時栢肆之役遠近流言賀蘭部帥附力眷紇突隣部帥匿物尼紇奚部帥叱奴根聚黨反於陰館南安公元順率軍討之不克死者數千詔安遠將軍庾岳摠萬騎還討叱奴根等滅之三月己酉車駕

次于盧奴寶遣使求和請送元觚割常山以西奉國乞守中山以東帝許之已而寶背約辛亥車駕次中山命諸將圍之是夜寶弟賀麟將妻子出走西山寶見賀麟走恐先據和龍壬子夜遂將其妻子及兄弟宗族數千騎北遁寶將李沈王次多張超賈歸等來降將軍長孫肥追之至范陽不及受還城內共立慕容普隣爲主夏四月帝以軍糧未繼乃詔征東大將軍東平公元儀罷鄴圍徙屯鉅鹿積租楊城普隣出步卒六千餘人伺間犯諸屯兵詔將軍長孫肥等輕騎挑之帝以虎隊五千橫截其後斬首五千生虜七百人宥而遣之夏五月庚子大賞功臣帝以中山城內爲普隣所勝而大軍迫之欲降無路乃密招喻之甲辰曜兵揚威以示城內命諸軍罷圍南徙以待其變甲寅以東平公元儀爲驃騎大將軍都督中外諸軍事克豫雍荆徐揚六州牧左丞相封衛王襄城

公元題進封爲王秋七月普隣遣烏丸張驥率五千餘人出城求食寇常山之靈壽殺害吏民賀麟自丁零中入于驥軍因其衆復入中山殺普隣而自立帝還幸魯口遣將軍長孫肥一千騎襲中山入其郭而還八月丙寅朔帝自魯口進軍常山之九門時大疫人馬牛多死帝問疫於諸將對曰在者纔十四五是時中山猶拒守而饑疫並臻羣下咸思還北帝知其意因謂之曰斯固天命將若之何四海之人皆可與爲國在吾所以撫之耳何恤乎無民羣臣乃不敢復言遣撫軍大將軍略陽公元遵襲中山芟其禾芟入郭而還九月賀麟饑窮率三萬餘人出寇新市甲子晦帝進軍討之太史令晁崇奏曰不吉帝曰其義云何對曰昔紂以甲子亡兵家忌之帝曰紂以甲子亡周武不以甲子勝乎崇無以對冬十月丙寅帝進軍新市賀麟退阻泝水依漸洳澤以自固甲戌帝臨其

營戰於義臺塢大破之斬首九千餘級賀麟單馬走西山遂奔鄴
慕容德殺之甲申其所署公卿尚書將吏士卒降者二萬餘人其
將張驤李沈慕容文等先來降尋皆亡還是日復獲之皆赦而不
問獲其所傳皇帝璽綬圖書府庫珍寶簿列數萬班賜功臣及將
士各有差中山平乙酉襄城王題薨丁亥遣三萬騎赴衛王儀將
以攻鄴是歲鮮卑秃髮烏孤私署大單于西平王

天興元年春正月慕容德走保滑臺儀克鄴收其倉庫詔賞將士
各有差儀追德至於河不及而還庚子車駕自中山行幸常山之
真定次趙郡之高邑遂幸于鄴民有老不能自存者詔郡縣賑恤
之帝至鄴巡登臺榭遍覽宮城將有定都之意乃置行臺以龍驤
將軍日南公和跋爲尚書與左丞賈彝率郎吏及兵五千人鎮鄴
車駕自鄴還中山所過存問百姓詔大軍所經州郡復貲租一年

除山東民租賦之半車駕將北還發卒萬人治直道自望都鐵關
鑿恒嶺至代五百餘里帝慮還後山東有變乃置行臺於中山詔
左丞相守尚書令衛王儀鎮中山撫軍大將軍略陽公元遵鎮渤
海之合口右軍將軍尹國先督租于冀州聞帝將還謀反欲襲信
都安南將軍長孫嵩執送斬之辛酉車駕發自中山至于望都堯
山徙山東六州民吏及徒何高麗雜夷三十六萬百工伎巧十萬
餘口以充京師車駕次于恒山之陽博陵渤海章武羣盜並起略
陽公元遵等討平之廣川太守賀盧殺冀州刺史王輔驅勒守兵
抄掠陽平頓丘諸郡遂南渡河奔慕容德二月車駕自中山幸繁
峙宮更選屯衛詔給內徙新民耕牛計口受田三月離石胡帥呼
延鐵西河胡帥張崇等聚黨數千人叛詔安遠將軍庾岳討平之
漁陽羣盜庫儻官韜聚衆反詔中堅將軍伊謂討之徵左丞相衛

王儀還京師詔略陽公遵代鎮中山夏四月壬戌進遵封常山王
南安公元順進封毗陵王征虜將軍歷陽公穆崇爲太尉安南將
軍鉅鹿公長孫嵩爲司徒帝祠天於西郊旗幟有加焉廣平太守
遼西公元意烈謀反於郡賜死原其妻子鄜城屠各董羌杏城盧
水郝奴河東蜀薛榆氏帥符興各率其種內附六月丙子詔有司
議定國號羣臣曰昔周秦以前世居所生之土有國有家及王天
下卽承爲號自漢以來罷侯置守時無世繼其應運而起者皆不
由尺土之資今國家萬世相承啟基雲代臣等以爲若取長遠應
以代爲號詔曰昔朕遠祖總御幽都控制遐國雖踐王位未定九
州逮于朕躬處百代之季天下分裂諸華之主民俗雖殊撫之在
德故躬率六軍掃平中土凶逆蕩除遐邇率服宜仍先號以爲魏
焉布告天下咸知朕意秋七月遷都平城始營宮室建宗廟立社

稷漁陽烏丸庫儻官韜復聚黨爲寇詔冠軍將軍王建討平之八
月詔有司正封畿制郊甸端徑術標道里平五權較五量定五度
遣使循行郡國舉奏守宰不法者親覽察黜陟之九月烏丸張驤
子超收合亡命聚黨三千餘家據勃海之南皮自號征東大將軍
烏丸王抄掠諸郡詔將軍庾岳討之冬十月起天文殿十有一月
辛亥詔尚書吏部郎中鄧淵典官制立爵品定律呂協音樂儀曹
郎中董謐撰郊廟社稷朝覲饗宴之儀三公郎中王德定律令申
科禁太史令晁崇造渾儀考天象吏部尚書崔玄伯摠而裁之閏
月左丞相驃騎大將軍衛王儀及諸王公卿士詣闕上書曰臣等
聞宸極居中則列宿齊其晷帝王順天則羣后仰其度伏惟陛下
德協二儀道隆三五仁風被於四海盛化塞于大區澤及昆蟲恩
霑行葦謳歌所屬八表歸心軍威所及如風靡草萬姓顙顙咸思

係命而躬履謙虛退自後已宸儀未彰衣服未御非所以上允皇
天之意下副樂推之心宜光崇聖烈示軌憲於萬世臣等謹昧死
以聞帝三讓乃許之十有二月己丑帝臨天文殿太尉司徒進璽
綬百官咸稱萬歲大赦改年追尊成帝已下及后號謚樂用皇始
之舞詔百司議定行次尚書崔玄伯等奏從土德服色尚黃數用
五未祖辰臘犧牲用白五郊立氣宣贊時令敬授民時行夏之正
徙六州二十二郡守宰豪傑吏民二千家于代都是歲蘭汗殺慕
容寶而自立寶子盛殺汗僭立慕容德自稱燕王

二年春正月甲子初祠上帝于南郊以始祖神元皇帝配降壇視
燎成禮而反乙丑曲赦京師始制三駕之法庚午車駕北巡分命
諸將大襲高車大將軍常山王遵等三軍從東道出長川鎮北將
軍高涼王樂真等七軍從西道出牛川車駕親勒六軍從中道自

駁髯水西北二月丁亥朔諸軍同會破高車雜種三十餘部獲七
萬餘口馬三十餘萬匹牛羊百四十餘萬驃騎大將軍衛王儀督
三萬騎別從西北絕漠千餘里破其遺迸七部獲二萬餘口馬五
萬餘匹牛羊二十餘萬頭高車二十餘萬乘并服玩諸物還次牛
川及薄山並刻石記功班賜從臣各有差庚戌征虜將軍庾岳破
張超於勃海超走平原爲其黨所殺以所獲高車衆起鹿苑於南
臺陰北距長城東包白登屬之西山廣輪數十里鑿渠引武川水
注之苑中疏爲三溝分流宮城內外又穿鴻雁池三月己未車駕
至自北伐甲子初令五經羣書各置博士增國子太學生員三千
人是月氏人李辯叛慕容德求援於鄴行臺尚書和跋跋輕騎往
應之克滑臺收德宮人府藏又破德桂林王鎮及郎吏將士千餘
人丙子遣建義將軍庾真越騎校尉奚斤討庫狄部帥葉亦干宥

連部帥竇羽泥於太渾川破之庫狄懃支子啓亦干率其部落內
附真等進破侯莫陳部獲馬牛羊十餘萬頭追殄遺進入大峨谷
中山太守仇儒亡匿趙郡推羣盜趙准爲主號使持節征西大將
軍冀青二州牧鉅鹿公仇儒爲准長史聚黨扇惑詔中領軍長孫
肥討平之夏四月前清河太守傅世聚黨千餘家自號撫軍將軍
五月癸亥征虜將軍庾岳討破之秋七月起天華殿辛酉大閱于
鹿苑饗賜各有差陳郡河南流民萬餘口內徙遣使者存勞之姚
興遣衆圍洛陽司馬德宗將辛恭靖請救八月遣太尉穆崇率騎
六千往赴之增啟京師十二門作西武庫除州郡民租賦之半辛
亥詔禮官備撰衆儀著于新令范陽人盧溥聚衆海濱稱使持節
征北大將軍幽州刺史之攻掠郡縣殺幽州刺史封沓干慕容盛遼
西太守李朗舉郡內屬西河胡帥護諾于丁零帥翟同蜀帥韓龔

並相率內附冬十月太廟成遷神元平文昭成獻明皇帝神主於
太廟十有二月甲午慕容盛征虜將軍燕郡太守高湖率戶三千
內屬辛亥詔材官將軍和突討盧溥天華殿成是歲呂光立其子
紹爲天王自稱太上皇光死庶子纂殺紹僭立禿髮烏孤死弟鹿
孤代立遣使朝貢

三年春正月戊午和突破盧溥於遼西生獲溥及其子煥傳送京
師轅之癸亥有事於北郊分命諸官循行州郡觀民風俗察舉不
法賜羣臣布帛各有差二月丁亥詔有司祀日於東郊始耕籍田
壬寅皇子聰薨三月戊子立皇后慕容氏是月穿城南渠通於城
內作東西魚池夏四月姚興遣使朝貢五月戊辰詔謁者僕射張
濟使於姚興已巳車駕東巡遂幸涿鹿遣使者以太牢祠帝堯帝
舜廟西幸馬邑觀灑源秋七月壬子車駕還宮起中天殿及雲母

堂金華室十有一月高車別帥勅力捷率九百餘落內屬十有二
月乙未詔曰世俗謂漢高起於布衣而有天下此未達其故也夫
劉承堯統曠世繼德有蛇龍之徵致雲彩之應五緯上聚天人俱
協明革命之主大運所鍾不可以非望求也然狂狡之徒所以顛
蹶而不已者誠惑於逐鹿之說而迷於天命也故有踵覆車之軌
蹈釁逆之蹤毒甚者傾州郡害微者敗邑里至乃身死名頹殃及
九族從亂隨流死而不悔豈不痛哉春秋之義大一統之美吳楚
僭號又加誅絕君子賤其僞名比之塵垢自非繼聖載德天人合
會帝王之業夫豈虛應歷觀古今不義而求非望者徒喪其保家
之道而伏刀鋸之誅有國有家者誠能推廢興之有期審天命之
不易察徵應之潛授杜競逐之邪言絕姦雄之僭肆思多福於止
足則幾於神智矣如此則可以保榮祿於天年流餘慶於後世夫

然故禍悖無緣而生兵甲何因而起凡厥來世勗哉戒之可不慎
歟時太史屢奏天文錯亂帝親覽經占多云改王易政故數革官
號一欲防塞凶狡二欲消災應變已而慮羣下疑惑心謗腹非丙
申復詔曰上古之治尚德下各有任而無爵易治而事序故邪謀
息而不起姦慝絕而不作周姬之末下凌上替以號自定以位制
祿卿世其官大夫遂事陽德不暢議發家陪故釁由此起兵由此
作秦漢之弊捨德崇侈能否混雜賢愚相亂庶官失序任非其人
於是忠義之道寢廉恥之節廢退讓之風絕毀譽之議興莫不由
乎貴尚名位而禍敗及之矣古置三公職大憂重故曰待罪宰相
將委任責成非虛寵祿也而今世俗僉以台輔爲榮貴企慕而求
之夫此職司在人主之所任耳用之則重捨之則輕然則官無常
名而任有定分是則所貴者至矣何取於鼎司之虛稱也夫桀紂

之南面雖高而可薄姬旦之爲下雖卑而可尊一官可以效智革門可以垂範苟以道德爲實賢於覆餗部家矣故量已者令終而義全昧利者身陷而名滅利之與名毀譽之疵競道之與德神識之家寶是故道義治之本名爵治之末名不本於道不可以爲宜爵無補於時不可以爲用用而不禁爲病深矣能通其變不失其正者其惟聖人乎來者誠思成敗之理察治亂之由鑒殷周之失革秦漢之弊則幾於治矣是歲乞伏乾歸爲姚興所破李嵩私署

涼州牧涼公

四年春正月高車別帥率其部三千餘落內附二月丁亥命樂師入學習舞釋菜于先聖先師丁酉分命使者循行州郡聽察辭訟糾劾不法三月帝親漁薦于寢廟夏四月辛卯罷鄴行臺詔有司明揚隱逸五月起紫極殿玄武樓涼風觀石池鹿苑臺秋七月詔

鎮遠將軍兗州刺史長孫肥步騎二萬南徇許昌彭城詔賜天下鎮戍將士布帛各有差冬十二月辛亥詔征西大將軍常山王遵等率衆五萬討破多蘭部帥木易于材官將軍和突率騎六千襲黜弗素古延等諸部集博士儒生比衆經文字義類相從凡四萬餘字號曰衆文經是歲慕容盛死寶弟熙僭立呂光弟子隆殺篡自立盧水胡沮渠蒙遜私署涼州牧張掖公蒙遜及李嵩並遣使朝貢

五年春正月丁丑慕容熙遣將寇遼西虎威將軍宿沓干等拒戰不利棄令支而還帝聞姚興將寇邊庚寅大簡輿徒詔并州諸軍積穀于平陽之乾壁戊子材官將軍和突破黜弗素古延等諸部獲馬三千餘匹牛羊七萬餘頭辛卯蠕蠕社崙遣騎救素古延等和突逆擊破之于山南河曲獲鎧馬二千餘匹班師賞賜將士各

有差二月癸丑征西大將軍常山王遵等至安定之高平木易千
率數千騎與衛辰屈丐棄國遁走追至隴西瓦亭不及而還獲其
輜重庫藏馬四萬餘匹駱駝犛牛三千餘頭牛羊九萬餘口班賜
將士各有差徙其民於京師沙門張翹自號無上王與丁零鮮于
次保聚黨常山之行唐夏四月太守樓伏連討斬之五月姚興遣
其弟安北將軍義陽公平率眾四萬來侵平陽乾壁為平所陷六
月治兵于東郊部分眾軍詔鎮西大將軍毗陵王順長孫肥等三
將六萬騎為前鋒秋七月戊辰朔車駕西討八月乙巳至於柴壁
平固守進軍圍之姚興悉舉其眾來救甲子帝渡蒙坑宋本作泥逆擊興軍
大破之冬十月平赴水而死俘其餘眾三萬餘人語在興傳獲興
征虜將軍尚書右僕射狄伯支越騎校尉唐小方積弩將軍姚梁
國建忠將軍雷星康官北中郎將康猥平從弟伯禽已下四品將

軍已上四十餘人獲先亡臣王次多靳懃並斬以徇興頻使請和
帝不許羣臣勸進平蒲坂帝慮蠕蠕為難戊申班師十有一月車
駕次晉陽徵相州刺史庾岳為司空遣左將軍莫題討上黨羣盜
秦頗丁零翟都於壺關丁丑上黨太守捕頗斬之都走林慮十有
二月辛亥至自西征蠕蠕社論犯塞詔常山王遵追之不及而還
越勤莫弗率其部萬餘家內屬居五原之北是歲禿髮鹿孤病死
弟儁檀統任遣使朝貢

六年春正月辛未朔方尉遲部別帥率萬餘家內屬入居雲中夏
五月大簡輿徒將略江淮平荆陽之亂秋七月鎮西大將軍司隸
校尉毗陵王順有罪以王還第戊子車駕北巡築離宮于豺山縱
士校獵東北踰蜀嶺出參合代谷九月行幸南平城規度灑南面
夏屋山背黃瓜堆將建新邑辛未車駕還宮冬十月起西昭陽殿

乙卯立皇子嗣宋本諱為齊王加車騎大將軍位相國紹為清河王加征南大將軍熙為陽平王曜為河南王封故秦愍王子夔為豫章王陳留王子右將軍悅為朱提王丁巳詔將軍伊謂率騎二萬北襲高車司馬德宗遣使朝貢十有一月庚午伊謂大破高車是年島夷桓玄廢其主司馬德宗而自立僭稱大楚

天賜元年春正月遣離石護軍劉託率騎三千襲蒲子三月丙寅擒姚興寧北將軍秦平太守衡譚獲三千餘口初限縣戶不滿百罷之夏四月詔尚書郎中公孫表使於江南以觀桓玄之釁也值玄敗而還蠕蠕社論從弟悅伐大那等謀殺社論而立大那發覺來奔五月置山東諸冶發州郡徒謫造兵甲秋九月帝臨昭陽殿分置眾職引朝臣文武親自簡擇量能敘用制爵四等曰王公侯子除伯男之號追錄舊臣加以封爵各有差是秋江南大亂流民

繼負而奔淮北行道相尋冬十月辛巳大赦改元築西宮十有一月上幸西宮大選朝臣令各辨宗黨保舉才行諸部子孫失業賜爵者二千餘人十有二月戊辰車駕幸狝山宮是歲島夷劉裕起兵誅桓玄

二年春二月癸亥車駕還宮夏四月車駕有事于西郊車旗盡黑是歲司馬德宗復僭立慕容德死兄子超僭立

三年春正月甲申車駕北巡幸狝山宮校獵至屋孤山二月乙亥幸代園山建五石亭三月庚子車駕還宮夏四月庚申復幸狝山宮占授著作郎王宜弟造兵法孤虛立成圖三百六十時遂登定襄角史山又幸馬城甲戌車駕還宮是月蠕蠕寇邊夜召兵將旦賊走乃罷六月發八部五百里內男丁築灑南宮門闕高十餘丈引溝穿池廣苑囿規立外城方二十里分置市里經塗洞達三十

日罷秋七月太尉穆崇薨八月甲辰行幸豺山宮遂至青牛山丙辰西登武要北原觀九十九泉造石亭遂之石漠九月甲戌朔幸漠南鹽池壬午至漠中觀天鹽池度漠北之吐鹽池癸巳南還長川丙申臨觀長陂冬十月庚申車駕還宮

四年春二月封皇子修爲河間王處文爲長樂王連爲廣平王黎爲京兆王夏五月北巡自參合陂東過蟠羊山大雨暴水流輜重數百乘殺百餘人遂東北踰石漠至長川幸濡源常山王遵有罪賜死秋七月車駕自濡源西幸參合陂築北宮垣三旬而罷乃還宮八月幸豺山宮是月誅司空庾岳冬十有一月車駕還宮是歲慕容寶養子高雲殺熙自立赫連屈丐自稱大單于大夏天王五年春正月行幸豺山宮遂如參合陂觀漁於延水至齊川三月姚興遣使朝貢是歲皇孫壽生

六年夏帝不豫初帝服寒食散自太醫令陰寔宋本死後藥數動發至此逾甚而災變屢見憂懣不安或數日不食或不寢達旦歸咎羣下喜怒乖常謂百寮左右人不可信慮如天文之占或有肘腋之虞追思旣往成敗得失終日竟夜獨語不止若傍有鬼物對揚者朝臣至前追其舊惡皆見殺害其餘或以顏色變動或以喘息不調或以行步乖節或以言辭失措帝皆以爲懷惡在心變見於外乃手自歐擊死者皆陳天安殿前於是朝野人情各懷危懼有司懈怠莫相督攝百工偷劫盜賊公行巷里之間人爲希少帝亦聞之曰朕縱之使然待過災年當過清治之爾秋七月慕容支屬百餘家謀欲外奔發覺伏誅死者三百餘人八月衛王儀謀叛賜死冬十月戊辰帝崩於天安殿時年三十九永興二年九月甲寅上謚宣武皇帝葬於盛樂金陵廟號太祖泰常五年改謚曰道武

史臣曰晉氏崩離戎羯乘釁僭偽紛紜豺狼競馳太祖顯晦安危之中屈伸潛躍之際驅率遺黎奮其靈武克剪方難遂啟中原朝拱人神顯登皇極雖冠履不暇栖遑外土而制作經謨咸存長世所謂大人利見百姓與能抑不世之神武也而屯厄有期禍生非慮將人事不足豈天實爲之嗚呼

魏書卷二 太祖紀第二

晉書卷二 太祖紀第二

魏書卷三

太宗紀第三

魏書卷三 太宗紀第三

太宗明元皇帝諱嗣太祖長子也母曰劉貴人登國七年生於雲中宮太祖晚有子聞而大悅乃大赦天下帝明敞寬毅非禮不動太祖甚奇之天興六年封齊王拜相國加車騎大將軍初帝母劉貴人賜死太祖告帝曰昔漢武帝將立其子而殺其母不令婦人後與國政使外家爲亂汝當繼統故吾遠同漢武爲長久之計帝素純孝哀泣不能自勝太祖怒之帝還宮哀不自止日夜號泣太祖知而又召之帝欲入左右曰孝子事父小杖則受大杖避之今陛下怒盛入或不測陷帝於不義不如且出待怒解而進不晚也帝懼從之乃遊行逃於外天賜六年冬十月清河王紹作逆太祖崩帝入誅紹壬申卽皇帝位大赦改年爲永興元年追尊皇妣爲

宣穆皇后公卿大臣先罷歸第不與朝政者悉復登用之詔南平公長張嵩北新侯安同對理民訟簡賢任能彞倫攸叙閏十月丁亥朱提王悅謀反賜死詔都兵將軍山陽侯奚斤巡行諸州問民疾苦撫恤窮乏十有二月戊戌封衛王儀子良爲南陽王陰平公元烈進爵爲王高涼王樂真改封平陽王己亥帝始居西宮御天文殿蠕蠕犯塞是歲乞伏乾歸據金城自稱秦王高雲爲海夷馮跋所滅跋僭號自稱大燕天王

二年春正月甲寅朔詔南平公長孫嵩等北伐蠕蠕平陽民黃苗等依汾自固受姚興官號并州刺史元六頭討平之二月癸未朔詔將軍于栗磾領步騎一萬鎮平陽夏五月長孫嵩等自大漠還蠕蠕追圍之於牛川壬申帝北伐蠕蠕聞而遁走車駕還幸參合陂秋七月丁巳立馬射臺於陂西仍講武教戰乙丑車駕至自北

伐八月章武民劉牙聚眾反山陽侯奚斤討平之九月甲寅葬太祖宣武皇帝於盛樂金陵冬十有二月辛巳詔將軍周觀率眾詣西河離石鎮撫山胡是歲司馬德宗將劉裕滅慕容超於廣固三年春二月戊戌詔曰衣食足知榮辱夫人饑寒切已唯恐朝夕不濟所急者溫飽而已何暇及於仁義之事乎王教之多違蓋由於此也非夫耕婦織內外相成何以家給人足矣其簡宮人非所當御及執作伎巧自餘悉出以配鰥民己亥詔北新侯安同等持節循行并定二州及諸山居雜胡丁零問其疾苦察舉守宰不法其寃窮失職疆弱相陵孤寒不能自存者各以事聞昌黎遼東民二千餘家內屬三月己未詔侍臣常帶劔夏四月戊寅河東蜀民黃思郭綜等率營部七百餘家內屬五月丁卯車駕謁金陵於盛樂己巳昌黎王慕容伯兒謀反伏誅六月姚興遣使來聘西河胡

張賢等率營部內附秋七月戊申賜衛士醕三日布帛各有差辛酉賜附國大人錦芻衣服各有差八月戊寅詔將軍東州侯尉古真統兵五千鎮西境太洛城冬十二月甲戌蠕蠕斛律宗黨吐觝子等百餘人內屬甲午詔南平公長孫嵩任城公嵇拔白馬侯崔玄伯等坐朝堂錄決囚徒務在平當

四年春二月癸未登虎圈射虎賜南平公長孫嵩等布帛各有差夏四月乙未宴羣臣於西宮使各獻直言秋七月己巳朔東巡置四廂大將又放十二時置十二小將以山陽侯奚斤元城侯元屈行左右丞相己卯大獮于石會山戊子臨去畿陂觀漁庚寅至于濡源西巡幸北部諸落賜以繒帛八月庚戌車駕還宮壬子幸西宮臨板殿大饗羣臣將吏以田獵所護賜之命民大醕三日乙卯賜王公以下至宿衛將士布帛各有差冬十有一月乙丑賜宗室

近屬南陽王良已下至於總麻之親布帛各有差十有一月丁巳車駕北巡至長城而還是年乞伏乾歸爲兒子公府所殺子熾盤立沮渠蒙遜自稱河西王

五年春正月己巳大閱畿內男子十二以上悉集己卯幸西宮頽拔大渠帥四十餘人詣闕奉貢賜以繒帛錦芻各有差乙酉詔諸州六十戶出戎馬一匹庚寅大閱於東郊部署將帥以山陽侯奚斤爲前軍衆三萬陽平王熙等十二將各一萬騎帝臨白登躬自校覽焉二月戊申賜陽平王熙及諸王公侯將士布帛各有差庚戌幸高柳川甲寅車駕還宮癸丑穿魚池於北苑庚午姚興遣使來聘詔分遣使者巡求僑逸其豪門疆族爲州閭所推者及有文武才幹臨疑能決或有先賢世胄德行清美學優義博可爲人師者各令詣京師當隨才叙用以贊庶政夏四月河東民薛相率部

內屬乙巳上黨民勞聰士臻羣聚爲盜殺太守令長相率外奔乙卯車駕西巡詔前軍奚斤等先行討越勤部於跋那山夏五月乙亥行幸雲中舊宮之大室丙子大赦天下西河張外建興王紹自以所犯罪重不敢解散庚戌遣元城侯元屈等率衆三千鎮并州乙卯詔會稽公劉潔永安侯魏勤等率衆三千鎮西河六月西幸五原校獵于骨羅山獲獸十萬獲澤劉逸自號征東將軍三巴王王紹爲署置官屬攻逼建興郡元屈等討平之秋七月己巳還幸薄山帝登觀太祖遊幸刻石頌德之處乃於其旁起石壇而薦饗焉賜從者大酺於山下奚斤等破越勤倍泥部落於跋那山西獲馬五萬匹牛二十萬頭徙二萬餘家於大寧計口受田河西胡曹龍張大頭等各領部擁衆二萬人來入蒲子逼脇張外於研子壘外懼給以牛酒殺馬盟誓推龍爲大單于奉美女良馬於龍丙戌

車駕自大室西南巡諸部落賜其渠帥繒帛各有差遂南次定襄大落城東踰七嶺山田於善無川八月癸卯車駕還宮癸丑奚斤等班師甲寅帝臨白登觀降民數軍實曹龍降執送張外斬之辛未賜征還將士牛馬奴婢各有差置新民於大寧川給農器計口受田丁丑幸材山宮癸未車駕還宮冬十月丁巳將軍元屈會稽公劉潔永安侯魏勤等擊吐京叛胡失利潔被傷勤死之十一月癸酉大饗于西宮姚興遣使朝貢來請進女帝許之

神瑞元年春正月辛酉以禎瑞頻集大赦改元辛巳幸繁峙賜王公已下至於士卒百工布帛各有差二月戊戌車駕還宮是月赫連屈孑入寇河東蒲子殺掠吏民三城護軍張昌等要擊走之庚戌幸材山宮西河胡曹成吐京民劉初原攻殺屈孑所置吐京護軍及其守三百餘人乙卯起豐宮於平城東北夏五月辛酉車駕

還宮六月司馬德宗冠軍將軍太山太守劉研弟輔國將軍領東平太守陽平趙鸞廣威將軍平昌太守羅卓斗城屠各帥張文興等率流民七千餘家內屬河西胡酋劉遮劉退孤率部落等萬餘家渡河內屬戊申幸材山宮丁亥車駕還宮秋八月戊子詔馬邑侯元陋孫使於姚興辛丑遣謁者悅力延撫慰蠕蠕于什門招諭馮跋詔平南將軍相州刺史尉古真與司馬德宗太尉劉裕相聞使博士王諒假平南參軍將命焉姚興遣使來聘冬十一月壬午詔使者巡行諸州校閱守宰資財非自家所齎悉薄為贓詔守宰不如法聽民詣闕告言之十二月丙戌朔蠕蠕犯塞丙申帝北伐蠕蠕河內人司馬順宰自號晉王太守討捕不獲是歲禿髮儂檀為乞伏熾磐所滅

二年春正月丙辰車駕至自北伐賜從征將士布帛各有差二月

丁亥大饗于西宮賜附國大渠帥朝歲首者繒帛金罽各有差司馬德宗琅邪太守劉朗率二千餘家內屬庚子河西胡劉雲等率數萬戶內附甲辰立太祖廟於白登之西三月詔曰刺史守宰率多逋慢前後怠惰數加督罰猶不悛改今年貲調懸違者譴出家財充之不聽徵發於民河西饑胡屯聚上黨推白亞栗斯為盟主號大將軍反於上黨自號單于稱建平元年以司馬順宰為之謀主夏四月詔將軍公孫表等五將討之河南流民二千餘家內屬衆廢粟斯而立劉虎號善王司馬德宗遣使朝貢巳卯車駕北巡五月丁亥次於參合東幸大窰丁未田于四岬山六月戊午幸去畿陂觀漁辛酉次于濡源築立蟀臺射白熊於頽牛山獲之丁卯幸赤城親見長老問民疾苦復租一年南次石亭幸上谷問百年訪賢俊復田租之半壬申幸涿鹿登橋山觀溫泉使使者以太

牢祠黃帝廟至廣甯登歷山祭舜廟秋七月還宮復所過田租之
半九月闕有差河南流民前後二千餘家內屬京師民饑聽出山
東就食冬十月壬子姚興使散騎常侍東武侯姚敞尚書姚泰送
其西平公主來帝以後禮納之辛酉行幸沮洳城癸亥車駕還宮
丙寅詔曰古人有言百姓足則君有餘未有民富而國貧者也頃
者以來頻遇霜旱年穀不登百姓饑寒不能自存者甚衆其出布
帛倉穀以賑貧窮十有一月丁亥幸狝山宮庚子車駕還宮

泰常元年春正月甲申行幸狝山宮戊子車駕還宮三月己丑長
樂王處文薨常山民霍季自言各載圖識持一黑石以爲天賜玉
印誑惑聚黨入山爲盜州郡捕斬之夏四月壬子大赦改元庚申
河間王脩薨六月丁巳車駕北巡秋七月甲申帝自白鹿陂西行
大獮于牛川登釜山臨殷繁水而南觀于九十九泉戊戌車駕還

宮九月戊午前并州刺史叔孫建等大破山胡劉虎渡河東走至
陳留爲從人所殺司馬順宰等皆死司馬德宗相劉裕沂河伐姚
泓遣其部將王仲德爲前鋒從陸道至梁城兗州刺史尉建畏懦
棄州北渡王仲德遂入滑臺詔將軍叔孫建等渡河曜威滑臺斬
尉建於城下冬十月壬戌幸狝山宮徒何部落庫儻官斌先降後
復叛歸馮跋驍騎將軍延普渡濡水討擊大破之斬斌及馮跋幽
州刺史漁陽公庫儻官昌征北將軍關內侯庫儻官提等首生擒
庫儻官女生縛送京師幽州平十一月甲戌車駕還宮築蓬臺於
北苑十二月南陽王良薨是歲姚興卒子泓立

二年春二月丙午詔曰九州之民隔遠京邑時有壅滯守宰至不
以聞今東作方興或有貧窮失農務者其遣使者巡行天下省諸
州觀民俗問民疾苦察守宰治行諸有不能自申皆因以聞辛

西司馬德宗滎陽守將傅洪遣使詣叔孫建請以虎牢降求軍赴
接德宗譙王司馬文思遣使王良詣闕上書請軍討劉裕詔司徒
長孫嵩率諸軍邀擊劉裕戰於畔城更有負捷帝詔止諸軍不克
夏四月丁未榆山丁零翟蜀率營部遣使通劉裕馮跋使人王特
兒等通於司馬德宗章武太守捕特兒等囚送京師丁巳幸高柳
壬戌車駕還宮五月汝南民胡譁等萬餘家相率內屬乙未司馬
德宗齊郡太守王懿來降車駕西巡至于雲中遂濟河田于大漠
秋七月作白臺於城南高二十丈司馬順之入常山流言惑衆稱
受天帝命年二十五應爲人君遂聚黨於封龍山趙郡大盜趙德
執送京師斬之八月劉裕滅姚泓九月癸酉司馬德宗平西將軍
荊州刺史司馬休之息譙王文思章武王子司馬國璠司馬道賜
輔國將軍溫楷竟陵內史魯軌荊州治中韓延之殷約平西參軍

桓謐桓璉及桓溫孫道子渤海刁雍陳郡袁式等數百人來降姚
泓匈奴鎮將姚成都與弟和都舉鎮來降冬十月巳酉詔司徒長
孫嵩等還京師遣叔孫建鎮鄴癸丑豫章王夔薨十有一月司徒
長孫嵩等諸軍至樂平詔嵩遣娥清周幾等與叔孫建討西山丁
零翟蜀洛支等悉滅餘黨而還復諸州租稅十有二月巳酉詔河
東河內有姚泓子弟播越民間能有送致京師者賞之庚申田于
西山癸亥車駕還宮氏豪徐駙奴齊元子等擁部落三萬於雍遣
使內附詔將軍王洛生及河內太守楊聲等西行以應之壬申幸
大甯長川姚泓尚書東武侯姚敞弟鎮遠將軍僧光右將軍姚
定世自洛來奔是年李嵩卒子歆立遣使朝貢

三年春正月丁酉朔帝自長川詔護高車中郎將薛繁率高車丁
零十二部大人衆北略至弱水降者二千餘人獲牛馬二萬餘頭

河東胡蜀五千餘家相率內屬二月司馬德宗遣使來貢庚戌幸西宮以范陽去年水復其租稅夏四月己巳徙冀定幽三州徒何於京師五月丙午詔叔孫建鎮廣阿壬子車駕東巡至于濡源及甘松遣征東將軍長孫道生給事黃門侍郎奚觀率精騎二萬襲馮跋又命驍騎將軍延普自幽州北趨遼西爲聲勢帝自突門嶺待之道生至龍城徙其民萬餘家而還六月乙酉車駕西還秋七月戊午至於京師八月鴈門河內大雨水復其租稅九月甲寅詔諸州調民租戶五十石積於定相冀三州冬十月戊辰築宮於西苑是歲司馬德宗卒弟德文僭立赫連屈丐僭稱皇帝

四年正月壬辰朔車駕臨河大蒐于犢渚癸卯車駕還宮三月癸丑築宮於蓬臺北司馬德文寧朔將軍平陽太守匈奴護軍薛辯及司馬楚之司馬順明司馬道恭並遣使請降夏四月庚辰車駕

有事於東廟遠藩助祭者數百國辛巳南巡幸鴈門賜所過無出今年租賦五月庚寅朔觀漁于灑水己亥車駕還宮復所過一年租賦六月司馬德文建威將軍河西太守馮翊羌酋党道子遣使內屬秋八月辛未東巡遣使祭恒岳甲申車駕還宮所過復一年田租九月築宮於白登山冬十有二月癸亥西巡至雲中踰白道北獵野馬於辱孤山至于黃河從君子津西渡大狩於薛林山五年春正月丙戌朔自薛林東還至于屋竇城饗勞將士大酺二日班禽獸以賜之己亥車駕還宮三月丙戌南陽王意文薨夏四月河西屠各帥黃大虎羌酋不蒙娥等遣使內附丙寅起灑南宮五月乙酉詔曰宣武皇帝體道得一天縱自然大行大名未盡美非所以光揚洪烈垂之無窮也今因啟緯圖始覩尊號天人之意煥然著明其改宣曰道更上尊謚曰道武皇帝以彰靈命之先啟

聖德之玄同告祀郊廟宣于八表庚戌淮南侯司馬國璠池陽侯
司馬道賜等謀反伏誅六月丙寅行幸翳獫山秋七月丁酉西至
于五原丁未幸雲中大室賜從者大酺八月癸亥車駕還宮閏月
甲午陰平王烈薨冬十有一月詔驍騎將軍延普城乾城十有二
月丁亥杏城羌酋狄溫子率三千餘家內附是歲劉裕廢殺其主
司馬德文僭自稱皇帝號宋李歆爲沮渠蒙遜所滅歆弟恂自立
於敦煌

六年春正月辛未行幸公陽二月調民二十戶輸戎馬一匹大牛
一頭三月甲子陽平王熙薨乙亥制六部民羊滿百口輸戎馬一
匹發京師六千人築苑起自舊苑東包白登周回四十餘里夏六
月乙酉北巡至蟠羊山秋七月西巡獵于祚山親射虎獲之遂至
于河八月庚子大獮于犢渚九月庚戌車駕還宮壬申劉裕遣使

朝貢冬十月己亥行幸代十有二月丙申西巡獵至于雲中是歲
沮渠蒙遜滅李恂

七年春正月甲辰朔自雲中西行幸屋竇城賜從者大酺三日蕃
渠帥繒帛各有差二月丙戌車駕還宮賜從者布帛各有差大饗
于西宮三月乙丑河南王曜薨夏四月甲戌封皇子燾爲泰平王
燾字佛釐拜相國加大將軍丕爲樂平王加車騎大將軍彌爲安
定王加衛大將軍毓爲樂安王加中軍大將軍健爲永昌王加撫
軍大將軍崇爲建寧王加輔國大將軍俊爲新興王加鎮軍大將
軍獻懷長公主子嵇敬封長樂王拜大司馬大將軍初帝素服寒
食散頻年動發不堪萬機五月詔皇太子臨朝聽政是月泰平王
攝政劉裕卒子義符僭立秋九月詔假司空奚斤節都督前鋒諸
軍事爲晉兵大將軍行揚州刺史交趾侯周幾爲宋兵將軍交州

刺史安固子公孫表爲吳兵將軍廣州刺史前鋒伐劉義符乙巳幸灑南宮遂如廣甯己酉詔泰平王率百國以法駕田于東苑車乘服物皆以乘輿之副辛亥築平城外郭周回三十二里辛酉幸橋山遣使者祠黃帝唐堯廟因東幸幽州見耆年問其所苦賜爵號分遣使者循行州郡觀察風俗冬十月甲戌車駕還宮復所過田租之半奚斤伐滑臺不克帝怒議親南討爲其聲援壬申車駕南巡出自天門關踰恒嶺四方蕃附大人各率所部從者五萬餘人十有一月泰平王親統六軍出鎮塞上安定王彌與北新公安同居守丙午曲赦司州殊死已下劉義符東郡太守王景度棄滑臺走詔成臯侯元苟兒爲兗州刺史鎮滑臺十有二月遣壽光侯叔孫建等率衆自平原東渡徇下青兗諸郡劉義符兗州刺史徐琰聞渡河棄守走叔孫建遂東入青州司馬愛之秀之先聚黨濟

東皆率衆來降

八年正月丙辰行幸鄴存恤民俗司空奚斤旣平兗豫還圍虎牢劉義符守將毛德祖距守不下河東蜀薛定薛輔率五千餘家內屬蠕蠕犯塞二月戊辰築長城於長川之南起自赤城西至五原延袤二千餘里備置戍衛二月乙巳帝田於鄴南韓陵山幸汲郡至于枋頭乙卯濟自靈昌津幸陳留東郡乙丑濟河而北西之河內造浮橋於冶坂津夏四月丁卯幸成臯城觀虎牢而城內乏水懸縋汲河帝令連艦上施轆轤絕其汲路又穿地道以奪其井遂至洛陽觀石經蠻王梅安率渠帥數千人來貢方物閏月己未還幸河內北登太行幸高都虎牢潰獲劉義符冠軍將軍司州刺史觀陽伯毛德祖冠軍司馬滎陽太守翟廣建威將軍竇霸振武將軍姚勇錯振威將軍吳寶之司州別駕姜元興治中竇溫士衆大

疫死者十二三辛酉帝還至晉陽班賜從官王公已下逮於厮賤
無不霑給五月庚寅還次鳳門皇太子率留臺王公迎于句注之
北庚寅車駕至自北巡六月己亥太尉宜都公穆觀薨丙辰北巡
至于參合陂遊于蟠羊山秋七月幸三會屋侯泉詔皇太子率百
官以從八月幸馬邑觀于灑源九月乙亥車駕還宮詔司空奚斤
還京師昌平侯娥清交趾侯周幾等鎮枋頭劉義符潁川太守李
元德竊入許昌詔周幾擊之元德遁關三字許昌還軍枋頭冬十
月癸卯廣西宮起外垣牆周回二十里十有一月己巳帝崩於西
宮時年三十二遺詔以司空奚斤所獲軍實賜大臣自司徒長孫
嵩已下至士卒各有差十有二月庚子上謚曰明元皇帝塋于雲
中金陵廟稱太宗帝禮愛儒生好覽史傳以劉向所撰新序說苑
於經典正義多有所闕乃撰新集三十篇採諸經史該洽古義兼

資文武焉

史臣曰太祖英雄北驅朔漠末年内多釁隙明元抱純孝之心逢
臬鏡之禍權以濟事危而獲安隆基固本内和外輯以德見宗良
無愧也

魏書卷三 太宗帝紀第三

魏書卷三

魏收書太宗紀亡史館舊本帝紀第三卷上有白簽云此卷是魏澹史案隋書魏澹傳澹之義例多與魏收不同其一曰諱皇帝名書太子字二曰諸國君皆書曰卒今此卷書封不同隋書稱魏澹書甚簡要不應如此重複乖戾疑此卷雖存亦殘缺脫誤

魏書卷四上

魏書卷四上

世祖紀第四上

世祖太武皇帝諱壽太宗明元皇帝之長子也母曰杜貴嬪天賜五年生於東宮體貌瓌異太祖奇而悅之曰成吾業者必此子也泰常七年四月封泰平王五月為監國太宗有疾命帝總攝百揆聰明大度意豁如也八年十月壬申即皇帝位大赦天下十有二月追尊皇妣為密皇太后進司徒長孫嵩爵為北平王司空奚斤為宣城王藍田公長孫翰為平陽王其餘普增爵位各有差於是除禁錮釋嫌怨開倉庫賑窮乏河南流民相率內屬者甚眾始光元年春正月丙寅安定王彌薨夏四月甲辰東巡幸大寧秋七月車駕還宮八月蠕蠕率六萬騎入雲中殺掠吏民攻陷盛樂宮赭陽子尉普文率輕騎討之虜乃退走詔平陽王長孫翰等擊

蠕蠕別帥破之殺數千人獲馬萬餘匹語在蠕蠕傳九月大簡興徒治兵於東郊部分諸軍五萬騎將北討冬十有二月遣平陽王長孫翰等討蠕蠕車駕次祚山蠕蠕北遁諸軍追之大獲而還是劉義符爲其臣徐羨之等所廢殺立義符弟義隆

二年春正月己卯車駕至自北伐以其雜畜班賜將士各有差二月慕容渴悉隣反於北平攻破郡治太守與守將擊敗之三月丙辰尊保母竇氏曰保太后丁巳以北平王長孫嵩爲太尉平陽王長孫翰爲司徒宜城王奚斤爲司空庚申營故東宮爲萬壽宮起永安樂二殿臨望觀九華堂初造新字千餘詔曰在昔帝軒舛制造物乃命倉頡因鳥獸之跡以立文字自茲以降隨時改作故篆隸草楷並行於世然經歷久遠傳習多失其真故令文體錯謬會義不愜非所以示軌則於來世也孔子曰名不正則事不成此

之謂矣今制定文字世所用者頒下遠近永爲楷式夏四月詔龍驤將軍步堆謁者僕射胡覲使於劉義隆五月詔天下十家發大牛一頭運粟塞上秋九月永安樂二殿成丁卯大饗以落之冬十月治兵於西郊癸卯車駕北伐平陽王長孫翰等絕漠追之蠕蠕北走事具蠕蠕傳是年赫連屈丐死子昌僭立

三年春正月壬申車駕至自北伐班軍實以賜將士行留各有差乞伏熾磐遣使朝貢請討赫連昌二月起太學於城東祀孔子以顏淵配夏五月辛卯中山公元纂進爵爲王南安公元素復先爵常山王六月幸雲中舊宮謁陵廟西至五原田於陰山東至和峴山秋七月築馬射臺于長川帝親登臺觀走馬王公諸國君長馳射中者賜金錦繒絮各有差八月車駕還宮劉義隆遣使朝貢帝以屈丐旣死諸子相攻九月遣司空奚斤率義兵將軍封禮雍州

刺史延普襲蒲坂宋兵將軍周幾率洛州刺史于栗磾襲陝城冬
十月丁巳車駕西伐幸雲中臨君子津會天暴寒數日水結十有
一月戊寅帝率輕騎二萬襲赫連昌壬午至其城下徙萬餘家而
還語在昌傳至祚山班所虜獲以賜將士各有差奚斤未至蒲坂
昌守將赫連乙升棄城西走昌弟助興守長安乙升復與助興自
長安西走安定奚斤遂入蒲坂十有二月詔斤西據長安秦雍氏
羌皆叛昌詣斤降武都氏王楊玄及沮渠蒙遜等皆遣使內附
四年春正月乙酉車駕至自西伐賜留臺文武生口繒帛馬牛各
有差從人在道多死其能到都者纔十六七巳亥行幸幽州赫連
昌遣其弟平原公定率衆二萬向長安帝聞之乃遣就陰山伐木
大造攻具二月車駕還宮三月丙子遣高涼王禮鎮長安詔執金
吾桓貸造橋於君子津丁丑廣平王連薨夏四月丁未詔員外散

騎常侍步堆謁者僕射胡觀等使於劉義隆是月治兵講武分諸
軍司徒長孫翰廷尉長孫道生宗正娥清三萬騎爲前驅常山王
素太僕丘堆將軍元太毗步兵三萬爲後繼南陽王伏真執金吾
桓貸將軍姚黃眉步兵三萬部攻城器械將軍賀多羅精騎三千
爲前候五月車駕西討赫連昌辛巳濟君子津三城胡酋鵠子相
率內附帝次拔隣山築城舍輜重以輕騎三萬先行戊戌至于黑
水帝親祈天告祖宗之靈而誓衆焉六月甲辰昌引衆出城大破
之事在昌傳昌將麾下數百騎西南走奔上邽諸軍乘勝追至城
北死者萬餘人臨陣殺昌弟河南公滿及其兄子蒙遜會日暮昌
尚書僕射問至拔城夜將昌母出走乙巳車駕入城虜昌羣弟及
其諸母姊妹妻妾宮人萬數府庫珍寶車旗器物不可勝計擒昌
尚書王買薛超等及司馬德宗將毛修之秦雍人士數千人獲馬

三十餘萬匹牛羊數千萬以昌宮人及生口金銀珍翫布帛班賚將士各有差昌弟平原公定拒司空奚斤於長安城娥清率騎五千討之西走上邽辛酉班師留常山王素執金吾桓貸鎮統萬秋七月己卯築壇於祚嶺戲馬馳射賜射中者金錦繒絮各有差蠕蠕寇雲中聞破赫連昌懼而還走八月壬子車駕至自西伐飲至策勲告於宗廟班軍實以賜留臺百寮各有差九月丁酉安定民舉城歸降冬十有一月以氏王楊玄爲都督荆梁益寧四州諸軍事假征南大將軍梁州刺史南秦王十有二月行幸中山守宰貪汚免者十數人癸卯車駕還宮復所過田租之半

神鼎元年春正月以天下守令多行非法精選忠良悉代之辛未京兆王黎薨二月改元赫連昌退屯平涼司空奚斤進軍安定將軍丘堆爲昌所敗監軍侍御史安頡出戰擒昌昌餘衆立昌弟定

爲王走還平涼三月癸酉詔侍中古弼迎赫連昌辛巳弼等以昌至于京師司空奚斤追定於平涼馬髦嶺爲定所擒丘堆先守輜重在安定聞斤敗棄甲東走蒲坂帝聞大怒詔安頡斬堆夏四月赫連定遣使朝貢帝詔諭之壬子西巡戊午田于河西大赦天下南秦王楊玄遣使朝貢六月丁酉并周胡酋卜田謀反伏誅餘衆不安詔淮南公王倍斤鎮慮虎撫慰之甲寅行幸長川秋七月車駕還宮八月東幸廣寧臨觀溫泉以太牢祭黃帝堯舜廟蠕蠕大檀遣子將萬餘騎入塞事具蠕蠕傳上郡休屠胡酋金崖率部內屬九月車駕還宮上洛巴渠泉午觸等萬餘家內附冬十月甲辰北巡王子田于牛川劉義隆淮北鎮將王仲德遣步騎二千餘入寇濟陽陳留是月車駕還宮閏月辛巳義隆又遣將王玄謨兗州刺史竺靈秀步騎二千人寇滎陽將襲虎牢豫州遣軍逆擊走之上郡

屠各隗詒歸率萬餘家內屬定州丁零鮮于臺陽翟喬等二千餘家叛入西山劫掠郡縣州軍討之失利詔鎮南將軍壽光侯叔孫建擊之十有一月行幸河西大校獵十有二月甲申車駕還宮是歲皇子見宋本諱生乞伏熾盤死子暮末僭立沮渠蒙遜遣使朝貢二年春正月赫連定弟酒泉公儁自平涼來奔丁零鮮于臺陽等歸罪詔赦之二月上黨李禹聚眾殺太守自稱無上王署置將帥河內守將擊破之禹亡走入山爲人執送斬之夏四月治兵于南郊劉義隆遣使朝貢庚寅車駕北伐以太尉北平王長孫嵩衛尉廣陵公樓伏連留守京師從東道與長孫翰等期會於賊庭五月丁未次于沙漠舍輜重輕騎兼馬至粟水蠕蠕震怖焚燒廬舍絕跡西走事具蠕蠕傳是月赫連定來侵統萬東至侯尼城而還秋七月車駕東轅至黑山校數軍實班賜王公將士各有差八月帝

以東部高車屯巴尼陂詔左僕射安原率騎萬餘討之事具蠕蠕傳冬十月振旅凱旋於京師告於宗廟列置新民於漠南東至濡源西暨五原陰山竟三千里詔司徒平陽王長孫翰尚書令劉潔左僕射安原侍中古弼鎮撫之十有一月西巡狩田于河西至祚山而還

三年春正月庚子車駕還宮壬寅大赦天下癸卯行幸廣寧臨溫泉作溫泉之歌二月丁卯司徒平陽王長孫翰薨戊辰車駕還宮三月壬寅進會稽公赫連昌爲秦王癸卯雲中河西勅勒千餘家叛尚書令劉潔追滅之帝聞劉義隆將寇邊乃詔冀定相三州造船三千艘簡幽州以南戍兵集于河上以備之夏四月甲子行幸雲中勅勒萬餘落叛走詔尚書封鐵追討滅之五月戊戌詔曰夫士之爲行在家必孝處朝必忠然後身榮於時名揚後世矣近遣

尚書封鐵翦除亡命其所部將士有盡忠竭節以殞軀命者今皆追贈爵號或有蹈鋒履難以自效者以功次進位或有故違軍法私離幢校者以軍法行戮夫有功蒙賞有罪受誅國之常典不可暫廢自今後以不善者可以自改其宣勅內外咸使聞知六月詔平南大將軍假丹陽王太毗屯于河上以司馬楚之爲安南大將軍琅邪王屯潁川秋七月己亥詔曰昔太祖撥亂制度草創太宗因循未遑改作軍國官屬至乃闕然今諸征鎮將軍王公仗節邊遠者聽開府辟召其次增置吏員庚子詔大鴻臚卿杜超假節都督冀定相三州諸軍事行征南大將軍太宰進爵爲王鎮鄴爲諸軍節度八月清河羣盜殺太守劉義隆將到彥之自清水入河泝流西行帝以河南兵少詔攝四鎮乃治兵將西討丙寅到彥之遣將渡河攻冶坂冠軍將軍安頡督諸軍擊破之斬首五千餘級投水

死者甚衆甲戌行幸南宮獵於南山戊寅詔征西大將軍長孫道生屯於河上九月己丑赫連定遣弟謂以代寇鄜城平西將軍始平公隗歸等率諸軍討之擒賊將王甲殺萬餘人謂以代遁走癸卯立密皇太后廟于鄴甲辰行幸統萬遂征平涼冬十月庚申到彥之王仲德沿河置守還保東平乙亥冠軍將軍安頡濟河攻洛陽丙子拔之擒義隆將二十人斬首五千級時河北諸軍會於七女津彥之恐軍南度遣將王蟠龍泝流欲盜官船征南大將軍杜超等擊破斬之辛巳安頡平虎牢義隆司州刺史尹沖墜城死十一月乙酉車駕至平涼先是赫連定將數萬人東禦於鄜城留其弟上谷公社于廣陽公度洛孤城守帝至平涼登北原使赫連昌招諭之社于不降詔安西將軍古弼等擊安定攻平涼定聞之棄鄜城入於安定自率步騎三萬從鶉觚原將救平涼與弼相遇

弼擊之殺數千人乃還走詔諸軍四面圍之甲午壽光侯叔孫建
汝陰公長孫道生濟河到彥之王仲德從清入濟東走青州義隆
兗州刺史竺靈秀棄須昌南奔湖陸丁酉定之水引衆下原詔武
衛將軍丘眷擊之定衆大潰死者萬餘人定中重創單騎遁走獲
定弟丹陽公烏視拔武陵公禿骨及公侯百餘人是日諸將乘勝
進軍遂取安定定從兄東平公乙升棄城奔長安劫掠數千家西
奔上邽戊戌叔孫建大破竺靈秀於湖陸殺獲五千餘人已亥帝
幸安定獲乞伏熾磐質子及定車旗簿其生口財畜班賜將士各
有差庚子帝自安定還臨平涼遂掘塹圍守之行幸紐城安慰初
附赦秦雍之民賜復七年定隴西守及將士數千人來降辛丑冠
軍將軍安頡率諸軍攻滑臺琅邪王司馬楚之破劉義隆將於長
社沮渠蒙遜遣使朝貢壬寅封壽光侯叔孫建爲丹陽王十有二

月丁卯定弟社于度洛孤面縛出降平涼平收其珍寶定長安臨
晉武功守將皆奔走關中平壬申車駕東還留巴東公延普等鎮
安定是歲馮跋死弟文通僭立

四年春正月壬午車駕次于木根山大饗羣臣賜布帛各有差丙
申劉義隆將檀道濟王仲德從清水救滑臺丹陽王叔孫建汝陰
公長孫道生拒之道濟等不敢進是月乞伏暮末爲赫連定所滅
二月辛酉安頡司馬楚之平滑擒義隆將朱脩之李元德及東
郡太守申謨突酉車駕還宮飲至策勳告於宗廟賜留臺百官各
有差戰士賜復十年丁丑行幸南宮定州民饑詔啟倉以賑之義
隆將檀道濟王仲德東走諸將追之至歷城而還三月庚戌冠軍
將軍安頡獻義隆俘萬餘人甲兵三萬夏五月庚寅行幸雲中六
月赫連定北襲沮渠蒙遜爲吐谷渾慕瓚所執閏月乙未蠕蠕國

遣使朝獻詔散騎侍郎周紹使于劉義隆秋七月己酉行幸河西
起承華宮八月乙酉沮渠蒙遜遣子安周入侍吐谷渾慕瓚遣使
奉表請送赫連定己丑以慕瓚爲大將軍西秦王九月癸丑車駕
還宮庚申加大尉長孫嵩柱國大將軍特進左光祿大夫崔浩爲
司徒征西大將軍長孫道生爲司空癸亥詔兼太常李順持節拜
河西王沮渠蒙遜爲假節加侍中都督涼州及西域羌戎諸軍事
行征西大將軍太傅涼州牧涼王壬申詔曰頃逆命縱逸方夏未
寧戎車屢駕不遑休息今二寇摧殄士馬無爲方將偃武脩文遵
太平之化理廢職舉逸民拔起幽窮延登僬父昧旦思求想遇師
輔雖殷宗之夢板築罔以加也訪諸有司咸稱范陽盧玄博陵崔
綽趙郡李靈河間邢穎勃海高允廣平游雅太原張偉等皆賢儻
之胄冠冕州邦有羽儀之用詩不云乎鶴鳴九臯聲聞于天庶得

其人任之政事共臻邕熙之美易曰我有好爵吾與爾靡之如玄
之比隱跡衡門不耀名譽者盡勅州郡以禮發遣遂徵玄等及州
郡所遣至者數百人皆差次敘用冬十月戊寅詔司徒崔浩改定
律令行幸漠南十一月丙辰北部勅勒莫弗庫若干率其部數萬
騎驅鹿數百萬詣行在所帝因而大狩以賜從者勒石漠南以記
功德宜城王奚斤坐事降爵爲公十二月丁丑車駕還宮

延和元年春正月丙午尊保太后爲皇太后立皇后赫連氏立皇
子見宋爲皇太子謁于太廟大赦改年己巳詔曰朕以眇身獲奉宗
廟思闡洪基廓清九服遭值季運天下分崩是用屢征罔或寧息
自始光至今九年之間戎車十舉羣帥文武荷戈被甲櫛風沐雨
蹈履鋒刃與朕均勞賴神祇之助將士宣力用能摧折疆豎克翦
大憝兵不極武而二寇俱滅師不違律而遐方以寧加以時氣和

洽嘉瑞並降遍於郡國不可勝紀豈朕一人獨應此祐斯亦羣后協同之所致也公卿因茲稽諸天人之會請建副貳夫慶賞之行所以褒崇勲舊旌顯賢能以永無疆之休其王公將軍以下普增爵秩啟國承家脩廢官舉僑逸蠲除煩苛更定科制務從輕約除故革新以正一統羣司當深思效績直道正身立功立事無或懈怠稱朕意焉二月丙子行幸南宮三月丁未追贈夫人賀氏爲皇后壬申西秦王吐谷渾慕瓚送赫連定于京師夏五月大簡輿徒于南郊將討馮文通劉義隆遣使朝貢六月庚寅車駕伐和龍詔尚書左僕射安原等屯于漠南以備蠕蠕辛卯兼散騎常侍鄧穎使於劉義隆秋七月己未車駕至濡水庚申遣安東將軍宜城公奚斤發幽州民及密雲丁零萬餘人運攻具出南道俱會和龍帝至遼西文通遣其侍御史崔聘奉獻牛酒己巳車駕至和龍臨其

城文通石城太守李崇建德太守王融十餘郡來降發其民三萬人穿圍塹以守之是月築東宮八月甲戌文通使數萬人出城挑戰昌黎公元丘與河間公元齊擊破之死者萬餘人文通尚書高紹率萬餘家保羌胡固己卯車駕討紹辛巳斬之詔平東將軍賀多羅攻文通帶方太守慕容玄於猴固撫軍大將軍永昌王健攻建德驃騎大將軍樂平王丕攻冀陽皆拔之虜獲生口班賜將士各有差九月乙卯車駕西還徙營丘成周遼東樂浪帶方玄菟六郡民三萬家于幽州開倉以賑之冬十月癸酉車駕至濡水吐谷渾慕瓚遣使朝貢十有一月乙巳車駕至自伐和龍十有二月己丑馮文通長樂公崇及其母弟朗弟邈以遼西內屬文通遣將封羽圍遼西先是辟召賢良而州郡多逼遣之詔曰朕除僞平暴征討累年思得英賢緝熙治道故詔州郡搜揚隱逸進舉賢俊古

之君子養志衡門德成業就才爲世使或雍容雅步三命而後至或棲棲遑遑負鼎而自達雖徇尚不同濟時一也諸召人皆當以禮申諭任其進退何逼遣之有也此刺史守宰宣揚失旨豈復光益乃所以彰朕不德自今以後各令鄉閭推舉守宰但宣朕虛心求賢之意既至當待以不次之舉隨才文武任之政事其明宣勅咸使聞知是年禿髮僊檀子保周棄沮渠蒙遜來奔以保周爲張掖公

二年春正月乙卯撫軍大將軍永昌王健督諸軍救遼西丙寅以樂安王範爲假節加侍中都督秦雍涇梁並五州諸軍事衛大將軍儀同三司鎮長安二月庚午詔兼鴻臚卿李繼持節假馮崇車騎大將軍遼西王承制聽置尚書已下賜崇功臣爵秩各有差征西將軍金崖與安定鎮將延普及涇州刺史狄子玉爭權構隙舉

兵攻普不克退保胡空谷驅掠平民據險自固詔散騎常侍平西將軍安定鎮將陸侯討獲之壬午行幸河西詔兼散騎常侍宋宣使於劉義隆丙申馮崇母弟朗來朝三月司馬德宗驃騎將軍司馬元顯子天助來降壬子車駕還宮夏五月己亥行幸山北六月遣撫軍大將軍永昌王健尚書左僕射安原督諸軍討和龍將軍樓勃別將五千騎圍瓦城文通守將封羽以城降收其民三千餘家辛巳詔樂安王範發秦雍兵萬人築小城於長安城內秋八月遼西王馮崇上表求說降其父帝不聽九月劉義隆遣使朝貢奉馴象一戊午詔兼大鴻臚卿崔曠持節拜征虜將軍楊難當爲征南大將軍儀同三司封南秦王冬十月南秦王楊難當率衆圍漢中十有一月甲寅車駕自山北還宮十有二月己巳大赦天下辛未幸陰山之北隴西休屠王弘祖率衆內屬金崖旣死部人立崖

從弟當川領其衆詔兼散騎常侍盧玄使於劉義隆是歲沮渠蒙遜死以其子牧犍爲車騎將軍改封河西王

三年春正月乙未車駕次于女水大饗羣臣班賜各有差戊戌馮文通遣其給事黃門侍郎伊臣乞和帝不許丙辰金當川反楊難當克漢中送雍州流民七千家於長安二月丁卯蠕蠕吳提奉其妹并遣其異母兄秃鹿傀及左右數百人朝貢獻馬二千匹戊寅詔曰朕承統之始羣凶縱逸四方未賓所在逆僭蠕蠕陸梁於漠北鐵弗肆虐於三秦是以旰食忘寢抵掌扼腕期在掃清逋殘寧濟萬寓故頻年屢征有事西北運輸之役百姓勤勞費失農業遭離水旱致使生民貧富不均未得家給人足或有寒窮不能自贍者朕甚愍焉今四方順軌兵革漸寧宜寬徃賦與民休息其令州郡縣隱括貧富以爲三級其富者租朕如常中者復二年下窮者

復三年刺史守宰當務盡平當不得阿容以罔政治明相宣約咸使聞知辛卯車駕還宮三月甲寅行幸河西閏月甲戌秦王赫連昌叛走丙子河西侯將格殺之驗其謀反羣弟皆伏誅己卯車駕還宮彭城公元粟進爵爲王辛巳馮文通遣尚書高顯上表稱藩詔徵其侍子戊子金當川率其衆圍西川侯彭文暉於陰密夏四月乙未詔征西大將軍常山王素討當川丁未行幸河西壬戌獲當川斬之于長安以徇六月甲辰車駕還宮辛亥撫軍大將軍永昌王健司空汝陰公長孫道生侍中古弼督諸軍討和龍芟其禾稼徙民而還秋七月辛巳東宮成備置屯衛三分西宮之一壬午行幸美稷遂至隰城命諸軍討山胡白龍于西河九月戊子克之斬白龍及其將帥屠其城冬十月癸巳蠕蠕國遣使朝貢甲午破曰龍餘黨于五原詔山胡爲白龍所逼及歸降者聽爲平民諸與

白龍同惡斬數千人虜其妻子班賜將士各有差十有一月車駕還宮十有二月甲辰行幸雲中

太延元年春正月壬午降死刑已下各一等癸未出太祖太宗宮人令得嫁甲申大赦改年二月庚子蠕蠕焉耆車師諸國各遣使朝獻詔長安及平涼民徙在京師其孤老不能自存者聽還鄉里丁未車駕還宮三月癸亥馮文通遣大將渴燭通朝獻辭以子疾夏五月庚申進宜都公穆壽爲宜都王汝陰公長孫道生爲上黨王宜城公奚斤爲恒農王廣陵公樓伏連爲廣陵王本官各如故遣使者二十輩使西域甲戌行幸雲中六月甲午詔曰頃者寇逆消除方表漸晏思崇政化敷洪治道是以屢詔有司班宣恩惠綏理百揆羣公卿士師尹牧守或未盡導揚之美致令陰陽失序和氣不平去春小旱東作不茂憂勤克已祈請靈祇上下咸秩豈朕

精誠有感何報應之速雲雨震灑流澤霑渥有鄙婦人持方寸玉印詣潞縣侯孫家旣而亡去莫知所在玉色鮮白光照內映印有三字爲龍鳥之形要妙竒巧不類人跡文曰旱疫平推尋其理蓋神靈之報應也朕用嘉焉比者已來禎瑞仍臻所在甘靈流液降於殿內嘉瓜合蒂生于中山野木連理殖於魏郡在先后載誕之鄉白鸞集于盛樂舊都玄鳥隨之蓋有千數嘉禾頻歲合秀於恒農白雉白兔並見於渤海白雉三隻又集於平陽太祖之廟天降嘉貺將何德以酬之所以內省驚震欣懼交懷其令天下大酺五日禮報百神守宰祭界內名山大川上答天意以求福祿丙午高麗鄯善國並遣使朝獻戊申詔驃騎大將軍樂平王丕等五將率騎四萬東伐文通秋七月田于柁楊巳卯丕等至於和龍徙男女六千口而還八月丙戌遂幸河西粟特國遣使朝獻九月甲戌車

駕還宮冬十月癸卯尚書左僕射安原謀反伏誅甲辰行幸定州
次于新城宮十有一月乙丑行幸冀州己巳校獵于廣川丙子行
幸鄴祀密太后廟諸所過對問高年褒禮賢俊十有二月甲申詔
曰操持六柄王者所以統攝平政理訟公卿之所司存勸農平賦
宰民之所專急盡力三時黔首之所克濟各修其分謂之有序今
更不然何以爲治越職侵局有紊綱紀上無定令民知何從自今
以後亡匿避難羈旅他鄉皆當歸還舊居不問前罪民相殺害收
守依法平決不聽私輒報者誅及宗族隣伍相助與同罪州郡縣
不得妄遣吏卒煩擾民庶若有發調縣宰集鄉邑三老計貲定課
哀多益寡九品混通不得縱富督貧避疆侵弱太守覆檢能否覈
其殿最列言屬州刺史明考優劣抑退姦吏升進貞良歲盡舉課
上臺牧守荷治民之任當宣揚恩化奉順憲典與國同憂直道正

身肅居官次不亦善乎癸卯遣使者以太牢祀北岳

二年春正月甲寅車駕還宮二月戊子馮文通遣使朝貢求送侍
子帝不許壬辰遣使者十餘輩詣高麗東夷諸國詔諭之三月丙
辰劉義隆遣使朝貢辛未平東將軍娥清安西將軍古弼率精騎
一萬討馮文通平州刺史元嬰又率遼西將軍會之文通迫急求
救於高麗高麗使其大將葛蔓盧以步騎二萬人迎文通甲戌以
開闕鎮虎牢夏四月甲申皇子小兒苗兒並薨五月乙卯馮文通奔
高麗戊午詔散騎常侍封揆使高麗徵送文通丁卯行幸河西赫
連定之西也楊難當竊據上邽秋七月庚戌詔驃騎大將軍樂平
王丕等督河西高平諸軍討之詔散騎侍郎廣平子游雅等使於
劉義隆八月丁亥遣使六輩使西域帝校獵于河西詔廣平公張
黎發定州七郡一萬二千人通莎泉道甲辰高車國遣使朝獻九

月庚戌驃騎大將軍樂平王丕等至略陽難當奉詔攝上邽守高麗不送文通遣使奉表稱當與文通俱奉王化帝以高麗違詔議將擊之納樂平王丕計而止冬十有一月己酉行幸柁陽驅野馬於雲中置野馬苑閏月壬子車駕還宮乙丑潁川王提改封武昌王河西王沮渠牧犍遣使朝貢是歲吐谷渾慕瓚死

三年春正月癸未征東大將軍中山王纂薨戊子太尉北平王長孫嵩薨乙巳鎮南大將軍丹陽王叔孫建薨二月乙卯行幸幽州存恤孤老問民疾苦還幸上谷遂至代所過復田租之半高麗契丹國並遣使朝獻三月丁丑以南平王渾爲鎮東大將軍儀同三司鎮和龍巳卯輿駕還宮癸巳龜茲悅般焉耆車師粟特疏勒烏孫渴槃陀鄯善諸國各遣使朝獻丁酉劉義隆遣使朝貢夏五月巳丑詔曰方今寇逆消殄天下漸晏比年以來屢詔有司班宣惠

政與民寧息而內外羣官及牧守令長不能憂勤所司糾察非法廢公帶私更相隱置濁貨爲官政存苟且夫法之不用自上犯之其令天下吏民得舉告守令不如法者丙申行幸雲中秋七月戊子使撫軍大將軍永昌王捷司空上黨王長孫道生討山胡白龍餘黨於西河滅之八月甲辰行幸河西九月甲申車駕還宮丁酉遣使者拜西秦王慕瓚弟慕利延爲鎮西大將軍儀同三司改封西平王冬十月癸卯行幸雲中十一月壬申車駕還宮甲申破洛那者舌國各遣使朝獻奉汗血馬是歲河西王沮渠牧犍出子封壇來朝

四年春三月庚辰鄯善王弟素延耆來朝癸未罷沙門年五十巳下江陽王根薨是月高麗殺馮文通夏五月戊寅大赦天下丙申行幸五原秋七月壬午車駕北伐事具蠕蠕傳冬十月乙丑大饗

六軍十二月丁巳車駕至自北伐上洛巴泉董等相率內附詔兼散騎常侍高雅使劉義隆

五年春正月庚寅行幸定州三月丁卯詔衛大將軍樂安王範遣雍州刺史葛郟取上洛劉義隆上洛太守鐔長生棄郡走辛未車駕還宮庚寅以故南秦王世子楊保宗爲征南大將軍秦州牧武都王鎮上邽夏四月丁酉鄯善龜茲疏勒焉耆諸國遣使朝獻五月丁丑治兵於西郊癸未遞逸國獻汗血馬六月甲辰車駕西討沮渠牧犍侍中宜都王穆壽輔皇太子決留臺事大將軍長樂王嵇敬輔國大將軍建寧王崇二萬人屯漠南以備蠕蠕秋七月巳巳車駕至上郡屬國城大饗羣臣講武馬射壬午留輜重分部諸軍撫軍大將軍永昌王健尚書令鉅鹿公劉潔諸軍與常山王素二道並進爲前鋒驃騎大將軍樂平王丕太宰陽平王杜超督平

涼鄜城諸軍爲後繼八月甲子永昌王健獲牧犍牛馬畜產二十餘萬牧犍遣弟董來率萬餘人拒戰於城南望塵退走丙申車駕至姑臧牧犍兄子祖踰城來降乃分軍圍之九月丙戌牧犍兄子萬年率麾下來降是日牧犍與左右文武五千人面縛軍門帝解其縛待以藩臣之禮收其城內戶口二十餘萬倉庫珍寶不可稱計進張掖公秃髮保周爵爲王與龍驤將軍穆羆安遠將軍源賀分略諸郡雜人降者亦數十萬牧犍弟張掖太守宜得燒倉庫西奔酒泉樂都太守安周南奔吐谷渾遣鎮南將軍奚眷討張掖遂至酒泉牧犍弟酒泉太守無諱及宜得復奔晉昌使弋陽公元潔守酒泉鎮北將軍封沓討樂都掠數千家而還班賜將士各有差戊子蠕蠕犯塞遂至七介山京師大駭皇太子命上黨王長孫道生等拒之事具蠕蠕傳冬十月辛酉車駕東還徙涼州民三萬餘

家于京師留驃騎大將軍樂平王丕征西將軍賀多羅鎮涼州癸亥遣張掖王禿髮保周諭諸部鮮卑保周因率諸部叛於張掖十有一月乙巳劉義隆遣使朝獻并獻馴象一是月高麗及粟特渴盤陀破洛郝悉居半諸國各遣使朝獻十有二月壬午車駕自西伐飲至策勳告於宗廟楊難當寇上邽鎮將元勿頭擊走之是歲鄯善龜茲疏勒焉耆高麗粟特渴盤陀破洛郝悉居半等國並遣使朝貢

魏書卷四上

世祖紀第四上終

魏書卷四上
世祖紀第四上終

